

DIPPEELETSO

2  ...go nna le metsots e mmalwa ena le lona batho. Mme ke leboga Mokaulengwe Pearry ka ntlha ya taletso ena ya go nna fano, le ka ntlha ya tirisano mmogo yotlhe ya lona.

3 Ke akanya gore ena ke ketelo ya rona ya boraro mo motsemogolong wa lona o o siameng thata. Re tlhola re fitlhela batho fano ba le botsalano, mme ba tlhola ba bua, ba aba, a kana ba a go itse, kgotsa nnyaya. Ke ile ka etela mangwe a mafelo a kgwebo, mme ka fa go leng gontle ka gone. Go lebega ka gale le gale go farologane go na le ka fa go leng ka gone golo ko bokone; ba mpona ke tsena, ba a go thusa ba bo ba tswa, mme moo ke gotlhe ga gone. Fela wena ke ka sewelo thata fa o etela lefelo go nne le gore mongwe a re, “Ke a go leboga! Boa mme o re bone gape!” Ke rata seo.

4 Fong, ke akanya gore Mokaulengwe Pearry fano, jaaka ke tlaa mmitisa seo, fela... Ke motona mo go rraagwe, jalo he ke fopholetsa gore nka mmitisa Mokaulengwe Pearry. Ka boutsana re ne re itse mosimane yo, ke fela ka ntlha ya go itsisiwe ke morwaake, Billy Paul, yo neng a ya sekolong nae. Fela fa go na le mongwe mo motsengmogolo ona, kgotsa mo tikologong, mo teng ga phitlhelelo ya thelebishine, yo o tlaa timelang kwa motlheng wa bofelo, ga go tle go nna ka gore Mokaulengwe Pearry ga a a ka a tsenya maiteko mangwe le mangwe go leka go tlisa batho ko go Keresete. Ena go tlhomame ga a a ka a tlogela lentswê le le lengwe le sa senolwa. Mme nna ke tsaya ena e le tshiamelo e ntltlentle ya go nna fano.

5 Fa Mokaulengwe Pearry a ne a nthaya a re, a ke tlaa “bua kwa modirong o monnye wa dijo tsa morafe” o neng a na le one, gore bangwe ba bankane ba gagwe ba kgwebo ba tlaa bo ba le fano. Sentle, nna ka tlhomamo ga ke sebui. Nna—nna ga ke ipolele go nna seo, fela ke ne ka akanya gore ke tlaa dira. E tlaa nna tlota ya me, morago ga go nna le taletso e e jalo, go bua le ba—ba... bankane ba gagwe ba kgwebo.

6 Ke na le tshiamelo ya go sepelela ditshabatshabeng, go dikologa lefatshe. Mme ke bua mo gontsi ke direla Full Gospel Business Men's Chapters. Mme ke a itse ena ke fela nako e nnye ya kabalan, jalo he ke tlaa rata go tlhalosa sengwe se se neng se kgatlhis ka nako nngwe. Go ne go na le monna, morago ga ke sena go fetsa go bua... Ba ne botlhe ba le borakgwebo. Mme, jalo he, ko ntle go ne ga nna le mogoma yo neng a tla ko go nna, mme o ne a re, “O moreri, a ga o jalo?”

Mme ke ne ka re, “Ee, rra.”

7 O ne a re, “Ke eng se o se duletseng gaufi le borakgwebo bana?”

Ke ne ka re, “Nna ke rrakgwebo.”

Jalo he o ne a re, “Ao, wena o ene?”

Mme ke ne ka re, “Ee, nna ke—nna ke rrakgwebo.”

Ne a re, “O mo kgwebong ya mohuta ofeng, rra?”

Mme ke ne ka re, “Tlhomamiso ya Botshelo jo Bosakhutleng.”

⁷ Mme ena o ne fela a se ntlhaloganye sentle. Ke ne ka go bua ka bonako. O ne a re, “Ao, in—Inshorense ya Botshelo jo Bosakhutleng.” Ga ke ise ke re inshorense; ke ne ka re tlhomamiso, mme ena... Fela ga ke ise ke mmolelele. Mme o ne a re, “Botshelo jo Bosakhutleng,” ne a re, “Ga ke itse. Ga ke dumele gore nkile ka utlwa ka ga gone pele.”

Ke ne ka re, “Moo go maswe thata.”

Ne a re, “Sentle,” o ne a re, “kantoro kgolo e ko kae?”

Ke ne ka re, “Legodimong.”

⁸ Ke santse ke le mo tirong eo. Ke tlaa rata go buisana ka mokwalo wa tumalano ya tshireletso le ope wa lona, morago ga tirelo e sena go fela, bosigong jono. Ke gakatsegile thata ka tiro ya me. Mme, jalo he, mme ga ke a ka ka re jaanong, “inshorense,” ke ne ka re, “tlhomamiso.”

⁹ Inshorense e siame, lo tlhaloganye. Ke gakologelwa... Jaaka go sololetswe, nna ka nako ena ga ke na epe.

¹⁰ Ke a gakologelwa, morago ga ke sena go nyala, mosadi wa me le nna re ne re ntse mo ntlong, letsatsi lengwe. Mme tsala e e molemo ya me... Morwarrê ke morekisi wa inshorense, Western-Southern. Mosimane yona o ne a le morekisi wa Prudential. Ke ne ka ya sekolong nae, mosimane yo o siameng thata. Mokaulengwe wa gagwe—wa gagwe o kwala *The Upper Room*, gonne, ke dumela gore ena ke modiredi wa Mobaptisti, mme o kwala dikgannya mo pampiring e nnye e e bidiwang *The Upper Room*. Batho ba ba siameng thata. Jalo he o ne a tthatloga go tla go mpona, letsatsi lengwe, mme o ne a re, o ne a re, “Billy, ke—ke utlwa gore o ne wa nna le boitekonyana nako nngwe mo inshorenseng.”

Mme ke ne ka re, “Ee.”

¹¹ O ne a re, “Gone ka mohuta mongwe go go naya maikutlonyana a a mogote ko go tsone?”

Ke ne ka re, “Nnyaya, eseng totatota.”

O ne a re, “Ke ne ka akanya gore ke tlaa tla mme ke bue ka ga mokwalo wa tumalano ya tshireletso le wena, Billy.”

¹² Mme ke ne ka re, “Sentle,” ke ne ka re, “Wilmer, ditebogo,” ke ne ka re, “fela ke—ke na le tshepiso.”

Mme o ne a re, “Ao, intshwarele.”

¹³ Mme mosadi wa me o ne a ntebateba, jaaka okare ke ne ke le moitimokanyi. O ne a itse gore ke ne ke sena epe. O ne a ntebelela a maketse fela. Ke ne ka re . . .

¹⁴ “Ao,” monna yo ne a re, “Intshwarele, Billy.” O tshwanetse a ne a akantse gore ke ne ke na le yone ka morwarrê, Jese. Mme ke ne ka re . . .

Mosadi wa me o ne a ntebelela. Mme monna yo . . . Ke ne ka re, “Ee, ke na le tlhomamiso.”

Mme o ne a re, “Ke kompone efeng e o nang nayo?”

Mme ke ne ka mmolelela selo se se tshwanang, “Botshelo jo Bosakhutleng.”

Mme o ne a re, “Ao,” ne a re, “a moo ke gone?”

¹⁵ Mme ke ne ka re, “Eya. Ke na le: Tshepiso e e Segofetseng, Jesu ke wa me! Ao, a tekeletso-pele ya kgalalelo ya Selegodimo! Nna ke mojaboswa wa pholoso, ke rekilwe ke Modimo, ke Tsetswe ke Mowa wa Gagwe, ke tlhapisitswe mo Mading a Gagwe.”

¹⁶ O ne a re, “Billy, moo go siame thata. Ke lebogela seo. Fela moo ga go tle go go tsenya fano mo mabitleng.”

¹⁷ “Fela,” ke ne ka re, “go tlaa nkentshetsa ko ntle. Ga ke a tshwenyega . . .” Uh-huh. Eya. Ga ke a tshwenyega ka ga go tsena; ke go tswa.

¹⁸ Ke santse ke tlaa rata go buisana le wena ka mokwalo wa tumalano ya tshireletso, morago ga tirelo, fa . . . Ke a tlhomamisa gore Go nepagetse.

¹⁹ Jaanong, ka tlwaelo ke dira gore batho ba eme fa re bala Lefoko, fela, bosigong jono, ke tlaa leka go tlola seo ka gore gone go bokete thata—thatta gore lona lo eme. Fela pele fela ga re bala Lefoko, mpe fela re obeng ditlhogo tsa rona metsotso e le mmalwa, jaaka re bua le Mokwadi wa Lefoko. Jaaka re ntse ka mohuta mongwe re tshamekisana ka metlae, mme ka mokgwa mongwe re iketlile, kgotsa, jaaka re go bitsa, re “repisetsa moriri wa rona ko tlase.” Jalo he a re yeng mo letlhakoreng le le boitshepo jaanong, le bopeloephepa, mme re lebiseng dipelo tsa rona ntlheng ya kwa Legodimong jaaka re bula Lefoko. Jaanong motho ope yo o nonofileng go tsamaisa diatla tsa gagwe a ka bula Baebele, fela ga go ope yo ka mmannete a ka kgonang go bula tlhaloganyo fa e se Mowa o o Boitshepo o mogolo, jalo a re bueng le Ena.

²⁰ Rraetsho wa Legodimo, rona ka tlhomamo re thabile, bosigong jono, go phuthega fano le setlhophha sena sa batho, ntlheng eno ya Bosakhutleng, mme re nne le kabalan ena e e siameng thata. Mme jaaka re nna fa tikologong ya ditafole tsena, bosigong jono, re lebane go kgabaganya, ebile re le badiri mmogo mo kgwebong le—le Bakeresete, re a lemoga gore go tla nako e nngwe e re tlaa kgatlhanang. Re tshepa gore rotlhe re tlaa

bo re le Koo, mongwe le mongwe a le teng kwa Selalelong se segolo seo sa lenyalo mo loaping, motlhong Kgosi a tlaa tswelang ntle, a phimole dikeledi tsotlhe mo matlhong a rona, mme a re, "Go dirilwe sentle, batlhanka ba Me ba ba molemo le ba ba ikanyegang, tsenang mo maipelong a Morena, a a ntseng a baakanyeditswe lona esale motheong wa lefatshe."

²¹ Fa go tshwanetse go nne le bangwe, Morena, ba ba sa Go itseng ka tsela eo, mme ke a rapela gore bosigong jono gore sengwe se tlaa dirwa kgotsa se buiwe se se tlaa ba dirang ba fetole tsela ya bone ya go akanya, ba sokologele ko go Wena; a kana ke fano jaanong jaana, kgotsa ka ti—tiriso ya thelebishine, kgotsa ka ditheipi tse di tlaa bong di tswa mo go ena.

²² Re segofatse ga mmogo jaanong, mme o segofatse go balwa ga Lefoko la Gago. Sokollela dipelo le dikakanjo tsa rona go ya ntlheng ya kwa bokhutlong jwa botshelo jona, le se se tlaa nnang seemo sa rona ka nako eo. Gonno re tlhomamisitse, Rara, gore botlhe ba rona re tshwanetse re tlogele lefatshe lena. Re batho ba ba swang, mme a re lebeleleng ko go Ena wa Bosakhutleng, Ena a le esi yo o ka re nayang Botshelo jo bo ka kwa ga jona. Ka Leina la Morwae, Jesu Keresete, re a go kopa. Amen.

²³ Ke tlaa rata go ngokela kelothhoko ya lona, metsotso e le mmalwa jaanong, ko palong ya Lefoko la Modimo. Ke tlaa rata go simolola go bala go tswa mo Efangeding ya ga Moitshepi Mareko, ke akanya gore kgaolo ya bo 10, mme ke simolole ka temana ya bo 17.

Mme ya re a ne a tswetse kong ka ko tseleng, go ne ga tla kwa go ena mongwe a tabogile, mme erile a ne a khubame... mme a mmotsa, a re, Moruti yo o Molemo, ke eng se ke tla se dirang gore ke tle ke rue botshelo jo bosakhutleng?

. . . Jesu ne a mo raya a re, "O mpiletsang yo o molemo? ga go ope yo o siameng fa e se a le mongwe, mme yoo ke, Modimo.

Wena o itse ditaelo, O sekwa wa dira boaka, O sekwa wa bolaya, O sekwa wa utswa, O sekwa wa supa bosupi jwa maaka, O sekwa wa tsietsa, Tlotla rraago le mmaago.

Mme o ne a araba a mo raya a re, Morena, dilo tsotlhe tsena tse ke di tlhomphile esale ke le bonaneng jwa me.

Foo Jesu a mo lebile ne a mo rata, mme o ne a mo raya a re, selo se le Sengwe se o se tlhaelang: tsamaya ka tsela ya gago, rekisa le fa e le eng se o nang naso, mme o abele bahumanegi, mme o tla nna le mahumo ko legodimong: mme o tle, o bo o tsaya sefapaano sa gago, o bo o ntshala morago.

Mme o ne a swaba ka ntlha ya polelo eo, mme a tloga a hutsafetse: ka gonno o ne a na le dithuo tse dintsi.

²⁴ Mma Morena a oketse ditshegofatso tsa Gagwe mo Lefokong jaaka re leka go ntsha mo go ena temana le dintlha tse di dikologileng tema. Jaanong ke akanya ka serutwa sa go nna le batho ba kgwebo, mme nna ka gale ke akanya gore batho ba kgwebo ba tlholo ba na le kgatlhego mo go—mo dipeeletsong tse di molemo, jalo he nna ke bitsa temana jaanong metsotsong e le mmalwa e e latelang: *Dipeeletso*.

²⁵ Rakgwebo yo o molemo o tlholo a batla pe—peeletso e e molemo, e e tlhaloganyegang sentle. Fa a se jalo, go raya gore ena ga se rrakgwebo yo o siameng. O tshwanetse a lebelele sengwe se se leng sa mmannete.

²⁶ Mme ke tlaa rata go bua le lona ka taletso e ke lo e neileng metsotso e le mmalwa e e fetileng, mo mokwalong ona wa Botshelo jwa Bosakhutleng, jaaka ke ne ke ikitsise ke le rra—rrakgwebo. Mme ke na le kgwebo, mme ke tlaa rata go bua le lona metsotso e le mmalwa ka ga gone. Mme Dikwalo di le mmalwa ke di kwadile fano, le temana, ke tlaa rata go dirisa tsena metsotso e le mmalwa, dintlha tsena.

²⁷ Ga se ti—tiro e e siameng go betšha. Motho mongwe le mongwe o itse seo, gore go betšha ga se kgwebo e e siameng, ka gore ke go lekeletsa. Ga o ke, kgotsa ka sewelo o bone mmetšhi... Letsatsi lengwe ke mohumi, mme letsatsi le le latelang o a kopakopa. Jalo he o tsaya tekeletso e ntsi, go—go betšha. Ke akanya gore mo—mo—mmetšhi o—o tshela fela go ya maikutlo a mo motsotsong, mme ena ga a lebelele pele ko isagong, kgotsa ena a ka bo a sa betšhe.

²⁸ Mme ga ke dumele mo dingweng tsa dipeeletso tsena tsa go huma fela fa bosigo bo sena go wela, le gone, ka kgwebo nngwe e e sa kaiwang. Jaanong, rakgwebo mongwe le mongwe yo o molemo a ka se ka a lekeletsa jalo, gongwe ka dipeeletso tsa gago—tsa gago tsa botshelo, dituelo tsa gago; mme wena o ne o tlaa beela mo go sengwe sa tlaya gaufi, o hume gone ka bobefo. Mme gone go sa kaiwa. Mongwe a tsene ka mohuta mongwe wa kakanyo, gore, “Fano re—re na le faboriki nngwe fano,” go sena motheo wa yone. Ke akanya gore motho yo o siameng, yo o akanyang ka tlhaloganyo e e siameng o tlaa bo a le sematla go leka go dira peeletso mo ko—komponeng e e ntseng jalo.

²⁹ Ka gore, ke ne ka nna le tsala, nako nngwe, e—e e neng ya leka selo se se jaana. Mme, erile a dira, o—o ne a latlhegelwa ke sengwe le sengwe se a neng a na naso, mme o ne a latlhegelwa ke dituelo tsotlhe tsa botshelo jwa gagwe. A ne a le gaufi le go rola marapo a tiro go ikhutsa, mme o ne a akanya, “Sentle, ke tlaa—ke tlaa tsaya tšhono ena,” ka gore monna yo o ne a lebega ekete o ne a itse se a neng a bua ka ga sone. Fela, ne ga tla ga itsiwe, ko—kompone e ne e le fela kompone ya boiketsisa-tumelo, mme go se diabe kgotsa sepe, jalo he mogoma yo o tlhomolang pelo ne a latlhegelwa ke sengwe le sengwe se a neng a na naso.

³⁰ Jalo ke akanya gore, fa motho a batla go dira peeelo e e molemo, ena pele o tshwanetse a tlhatlhobe kompone ya gagwe, kgotsa le fa e ka nna eng se a dirang peeletso ya gagwe mo go sone, mme a batlisise se a ileng go se dira. Ke akanya gore motho ope yo o akanyang ka go tlhaloganya o tlaa dira seo.

³¹ Mme fong gape, pele ga ke tswelela, ke tlaa rata go bua ke re, ga se mogopolo o siameng go boloka madi a gago mo pataneng ya gago. Batho ba le bantsi ba re, “Ke tlaa—ke tlaa a tsenya fela mo pataneng ya me, mme nna—nna . . . mme nna ke na nao.” Fela, lo a itse, lona borakgwebo le basadi, ga lo akanye ka mafoko ao. Mme ga se selo se se siameng, ka gore one a ka nna a utswiwa.

³² Go botoka gore o nne le one mo a dirisiwang gone. Jaaka Morena a ne a bua, nako nngwe, O ne a neela ditalente tsa palo e e rileng mo palong e e rileng, le mo go jalo, mme ka nako eo ena . . . ba ne ba dira peeletso ka tsone. Mme bao ba ba dirileng peeletso e e molemo, ee tlhomameng, O ne a ba naya merokotso. Fela fa monna a le mongwe a ne a re, “Nna—nna ke ne fela ka e boloka. Nna—nna ke ne ke sa batle go lekeletska ka yone. Ke—ke—ke e tsentse mo pataneng ya me. Kgotsa, ke e fitlhile golo gongwe.” Fong O ne a tsaya eo e A neng a e mo neile, mme a e neela mongwe yo neng a nna le merokotso e mentsi, yo neng a e bayo ko peeletsong e e siameng. Mme eo ke tsela ya Morena wa rona ya go dira dilo.

³³ Jaanong, fela fa o ne o ile go beeleta mo sengweng se o neng o batla go tlhomama mo go sone, o ne o tlaa senka faboriki nngwe e e molemo, e e ikanyegang e e neng ya netefatswa gore e tlaa duela sentle. Jaanong, eo ke peeletso e e molemo, e e tlhomameng. Morago ga o sena go tlhatlhoba faboriki, o itse metheo ya yone, o buile le mongwe yo o dirileng kgwebo le faboriki ena, mme o utlwa bopaki jwa mongwe le mongwe, “Yone ke lekgolo mo lekgolong. Bona ba tlhola ba opile kgomo lenaka ka merokotso ya bona. Mme—mme go na le motswedi o mogolo fa morago ga yone, gore kompone ena ga e tshone.” Mme moo ke peeelo e e molemo, e e tlhaloganyegang sentle. Mme jaanong, gotlhе go ralala botshelo, batho ba nnile ba rutwa seo.

³⁴ Jaanong re bua bosigong jono ka ga Lokwalo, la mosimane yo monnye wa Mohebere, yo e neng e le mo—mohuta o o humileng wa mosimane. A ka tswa a ne a tswa ko legaeng le le molemo tota, ga go pelaelo. Bopaki jwa gagwe bo ne bo supegetsa gore o ne a tswa ko le—legaeng le le molemo. O ne a bidiwa, mo Baebeleng, “mmusi wa monana yo o humileng.” Ke ile go go fetola bosigong jono, fela ga nnyennyane, ke re, “rakgwebo wa monana yo o humileng,” ka gore o ne a na le kgwebo, mme o ne a na le kgatlhego mo—mo kgwebong. Mme ga go pelaelo epe rraagwe o ne a le rakgwebo yo mogolo yo o atlegileng, kgotsa ena kooteng a ka bo a ne a sena se a neng a na le sone. Fela o ne a godisiwa go—go nna rakgwebo.

³⁵ Mme o ne a bona sengwe mo Mogomeng yona wa monana wa Galelea, Moporofeti yona wa monana ka Leina la Jesu wa Nasaretha. Ga go pelaelo o ne a utlwile moperesiti wa gagwe a bua ka ga Ena, mme gongwe kgathhanong Nae. Fela erile a ne a nna le kgabodiso ya gagwe ya ntsha ko go Morena Jesu, go ne go na le sengwe ka ga Ena se se neng se farologane le motho ope o sele.

³⁶ Mme ke bua sena, jaaka Mokeresete, gone ka nnete ga go ise go fetoge. Re na le baithuti ba bagolo ba bodumedi le ditumelo mo lefatsheng, go ralala lefatshe, rre nnile re na le bone ka dingwaga di le dikete, ba ba ka re itsiseng tu—tumelo ya kereke. Mme ba rutilwe mo ditumelong tseo tsa kereke, le kereke e e—e leng kereke e e tlhomilweng sentle. Fela moo go santse go se wa me—mokwalo wa me wa tumalano ya tshireletso bosigong jono e ke buang ka ga yone. Ke bua ka ga Botshelo jo Bosakhutleng.

³⁷ Mme mogoma yona wa monana, a neng a itse gore o ne a le leloko la kereke, fela a ne a bona mo go Jesu sengwe se se farologaneng. Jalo he o ne a neelwa tshono ya go dira peeletso, fa a ne a fitlhela Jesu ebole a bona se A neng a se dira. Mme o ne a badile Baebele ya gagwe, ebole a bone mo go Jesu gore selo se a utlwileng baporofeti ba gagwe ba se bala mo kerekeng ya gagwe, le se ba neng ba le sone. Mme ena go sena pelaelo epe o ne a ithuta seo. Mme foo erile a bona mo go Jesu yona wa Nasaretha, yo neng go akanngwa mo gare ga batho, e le Moporofeti, o ne a bona sengwe mo Monneng yona se se neng sa Mo kaya ka Dikwalo.

³⁸ Mme ke akanya gore, gompieno, ga go a fetoga thata thata. Babadi ba Baebele le barati ba Baebele, fa rona ka nnete re nna le kgabodiso mo matlhaleng a rona, ya se Jesu a neng a le sone le se A leng sone, go fetola maitsholo otlhe a rona. Ga go ope yo o tshwanang le Ena, go sa kgathalesege ka fa a siameng thata ka gone. Re ne ra re re tlhaloganya gore O... Re gopola gore O ne a sena thutego epe e ntsi, mme O ne a bua jaaka monna yo o tlwaelegileng, ebole a apara jaaka monna yo o tlwaelegileng, mme a tshela le banna ba ba tlwaelegileng. Fela le fa go ntse jalo go ne go na le sengwe se se lemosegang ka ga Monna yona, mme se ne sa ngoka kelotlhoko ya mogoma yona wa monana. Go fitlha fa e leng gore, gore, o ne a na le khumo yotlhe ya lefatshe, motlhaope, e a neng a e tlhoka mme o ne a tlaa e dirisa mo botshelong jwa gagwe, mme o ne a kgotsofetse sentle ka seo. Fela o ne a bone gore Monna yona o ne a leba ka mo isagong ebole a ba bolelela dilo tse di neng di tla, mme a Ikaya mo Lekwalong, mme Modimo o ne a Ikaya mo Monneng yo.

³⁹ Jaanong ga go motho yo o tshelang, yo o leng mo monaganong wa gagwe o o siameng, fa e se yo o tlholang a ipotsa kwa a tswang gone, ena ke mang, le gore ena o ya kae? Go nnile le dibuka di le dintsi tse di kwadilweng, batlhalefi ba kakanyo ba ne ba tsoga ba ba ba wa. Fela go na le Buka e le nngwe fela e e tlaa go boleleng yo o leng ene, kwa o tswang gone, le kwa o yang gone,

mme eo ke Baebele. Eo ke Buka e le nosi. Ya dibuka tsotlhe tse di siameng thata tse re nang natso, o ka di latlhela maleleng, nngwe le nngwe. Mona ke Boammaaruri. Sengwe le sengwe se se kganetsanong le Ena ga se a siama. “Magodimo le lefatshe di tlaa feta, fela Lefoko la Me ga le kitla le palelwa. Lefoko la motho mongwe le mongwe le tlaa nna leaka; la Modimo le tlaa nna boammaaruri.”

⁴⁰ Mme fa o bona sengwe ka tlhomamo jaana fa pele ga gago, le Dikwalo di ne di se solofeeditse motlha oo, se Mesia yoo a neng a tshwanetse go nna sone. Mme lekau lena le ne la bona seo se kailwe ke Modimo, ka ntlha eo moo gone ga dira Jesu a farologane gotlhelele le motho mongwe o sele yo a kileng a mmona. Jalo he, o ne a neelwa tshono.

⁴¹ Fa a ne a fitlhela Morena Jesu, mme kooteng a Mmona mo dikopanong tsa Gagwe le tirelo ya Gagwe, o ne a tabogela kwa go Ena a bo a wela fatshe fa dinaong tsa Gagwe, a supegetsa gore boitsholo jwa gagwe jwa katamelo bo ne bo nepagetse.

⁴² Mme o ne a re, “Moruti yo o Molemo, ke eng se nka se dirang go nna le Botshelo jo Bosakhutleng?” Jaanong seo ke selo se go botswang ka sone. Eseng tshetele ya gagwe, kgotsa eseng, “A nka ipataganya le kereke ya Gago, Rra? Kgotsa a nka nna leloko la lekgotla la Gago?” Fela, “Ke tshwanetse ke dire eng gore ke nne le Botshelo jo Bosakhutleng?” Eo e ne e le potso.

⁴³ Mme o ne a neelwa tshono ya go Bo amogela, fela o ne a dira tshwetso ya go khakhabuela. O ne a . . . ne a e gana. O ne a se na kgatlhego, fa a ne a itse se se neng se tsamaya le yone. O ne a lemoga, gore gore a tle a kgone go dira sena, o ne a tshwanelo go tlogela tumo ya gagwe. Ka gore, Jesu o ne a sa ratege thata, a sa dumelwe mo gare, ke tlaa bua ka go tlhaloganyega gore, masome a ferabongwe mo lekgolong a batho, kgotsa gongwe masome a ferabongwe le botlhano mo lekgolong ba ne ba dira. O ne a sa dumelwe, jaaka motho mongwe “yo o mowa-bosula,” mme o ne a bidiwa, ke ba le bantsi, “Beelsebule,” diabolo.

⁴⁴ Mme, le fa go ntse jalo, Dikwalo gotlhelele di a Mo tshwaya. O ne a ba umaketse, a re, “Phuruphutsang Dikwalo, gonne mo go Tsone lo akanya gore lo na le Botshelo jo Bosakhutleng. Mme Tsone ke Tsone tse di supang ka ga Me, kgotsa di bolela gore Nna ke Mang.”

⁴⁵ Mosimane yona wa Mohebere, a neng a godiseditswe mo lelwapeng, mme a ne a itse gore Baebele e ne e—e ne e ba boleletse ka go itsheka, dikwalo tsa momeno. Modimo Jehofa o ne a buile gore, “Fa go tlhatloga mongwe mo gare ga lona, yo o leng semowa, kgotsa moporofeti, Nna Morena ke tlaa mo Ikitsitse ka diponatshegelo. Mme fa se a se buang se diragala, fong utlwang moporofeti yoo, gonne Ke na nae. Fela fa go sa diragale, fong lo sek a lwa go utlwya.”

⁴⁶ Eo ke puo e e tlhamaletseng. Ke fela go akanya mo go nepileng. Fa a go buile, mme go sa diragale, go raya gore ke leaka; Modimo ga a go bua. Fela fa a bua, mme gone—gone go diragala, moo ke boammaaruri; mme ga go sepe se se fetang, se se leng boammaaruri go feta thata go na le boammaaruri.

⁴⁷ Jalo he lekau lena le ne le bone sena mo go Morena Jesu, mme ne a itse gore O ne a tshotse dilotlele tsa Botshelo jona jo Bosakhutleng, mme o ne a batla Botshelo jona jwa Bosakhutleng, fela o ne a gana tšhono ya go dira peeletso ya gagwe. O ne a sena kgatlhego mo peeletsong e jalo. Le fa pe . . .

⁴⁸ O ne a kailwe sentle gore O ne a le Morwa Modimo. A tshwailwe ka boitekanelo. Kgarebane o ne a ithwala, a tsala Morwa. O ne a dirile sesupo sengwe le sengwe se Mesia a neng a tshwanetse go se dira.

⁴⁹ Fela gore a tle a Mo amoge, o ne a tshwanela go tloga mo ngwaong ya gagwe. O ne a tshwanetse go fapoga mo go yone.

⁵⁰ Re tlaa rata go abela seo fela ko . . . mosimaneng yona wa Mojuta, fela go maswe thata gore re tshwanetse gape re go lemogeng, gompieno, ka tsela e e tshwanang. Ke tlhwatlhwa e kgolo. Re ka abela ko dikerekeng tsa gompieno. Mme makgetlo a le mantsi, batho ba ba ipitsang badumedi, mme ba sa etleetsegela go ikgaoganya le go tloga mo dilong tsa lefatshe, jaaka mmusi yona wa monana a ne a kopiwa go dira, go nna le mokwalo wa tumalano ya tshireletso ya Botshelo jo Bosakhutleng. Le fa go ntse jalo, morago, le rona re E bona e kailwe sentle ke Lekwalo, gore Ditumalano tsa tshireletso di santse di neelwa le fa e le mang yo o batlang go E amogela.

⁵¹ Jaaka ke ne ka bua, o ne a bona sengwe mo go Jesu, se go seng motho ope yo neng a na le sone, fela tlhwatlhwa e ne e le kgolo thata gore o ne a sa batle go duela tlhwatlhwa.

⁵² Ke selo se se tshwanang gompieno. Jaaka ke dumela, bosigong jono, ke ka nna ka bo ke bua le makoko a a farologaneng, Methodisti, Baptisti, Presbitheriene, Khatholike ya Roma, Orthodox Jew, Buda, le fa e ka nna eng mo gongwe, moo ke batho ba kgwebo ba metsemegolo. Fela go na le, ka mmannete, fa o bona sengwe ka matlho a e leng a gago, se Dikwalo di se kayang gore ke boammaaruri; re tlaa bo re le batho ba ba senang tlhaloganyo thata, gore, fa rona re na le kgatlhego mo Botshelong jo Bosakhutleng, re Bo gane. E tlaa bo e le tshwe—tshwetso e e dirilweng ka go khakhabuela jaaka lekau lena le e dirile. Makgetlo a le mantsi, le e leng baruti ba rona gompieno ba dira phoso ena e e tshwanang ya go khakhabuela, le fa ba le baithuti ba ba atlegileng go ithuta mo ditumelong tsa dikereke, ba ba e itseng go tloga go A go ya go Z. Fela, gakologelwang, baperesiti bao mo motlheng oo ba ne ba itse dikwalo tsa momeno, go tloga go A go ya go Z, le bone, fela ba ne ba palelwa ke go bona se lekau lena le se boneng.

⁵³ Mme o ne a na le kgatlhego mo—mo goreng Jesu a mo neye Botshelo jo Bosakhutleng. Fela erile a ne a fitlhela se go neng go ile go se mo lopa, ka nako eo o ne a sena kgatlhego.

⁵⁴ Lo a itse, Baebele e a re bolelela, mo pakeng ena e re tshelang mo go yone. Jaaka Mokaulengwe Pearry wa rona yo o pelontle bogolo a neng a re ranolela, gore o ne a dumela gore go ne go le mo metlheng ya bofelo. Nna ka tlhomamo, ke dumela seo ka nitamo ka pelo ya me yothle. Ke dumela gore Lekwalo le a go kaya.

⁵⁵ Ke dumela gore—gore—gore maranyane a a go kaya. Boramaranyane ba re, “Ke metsotsotso e le meraro go fitlheleng bosigogare.” Ma—ma . . . Dithulaganyo tsa rona tse re di bonang mo thelebishineng le—le mo seromamoweng, le—le ka fa batho ba rona ba itsholang ka gone, gone ke . . .

⁵⁶ Jaaka ke dirile tshwaelo fano kgotsa golo gongwe go sele, gore go nkgopotsa, ka ga go tswelela gotlhe mo ba go dirang, go nkgopotsa ka ga mosimanyana a raletse mabitla ka nako ya bosiga, a letsas molodi, a leka go itira gore a akanye gore ga a tshoga, fela ena o jalo.

⁵⁷ Seo ke se e leng bothata ka go tswelela ga rona gotlhe mo re go dirang gompieno, ga go tswelela gotlhe ga rona mo go ratategang thata. Re leka go dira batho ba akanye gore ga re itse gore oura e gaufi thata, fela re a itse gore yone e jalo. Boramaranyane ba rona ba a go itse. Ba rona . . . Pentagon e a itse. Rotlhe, rona rotlhe re a itse gore go sengwe se se gaufi le go diragala. Wena, wena o ka go utlwa gone mo tikologong, mme re a itse gore go gaufi.

⁵⁸ Mme Baebele ya rona e a re bolelela, mo go Tshenolo kgaolo ya bo 3, gore kereke mo pakeng ena e ile go kaiwa fela jaaka mosimane yona yo o humileng, wa monana, wa Mohebere, “e humile, e sa tlhoke sepe,” Paka ena ya Laodikea. Fa go diragala gore go nne le badiredi fano, kgotsa babadi ba Baebele. Ena ke Paka ya Laodikea. Mme e ne ya re, “Ka gore nna ke humile, ke dutse jaaka mohumagadi, ga ke na lethhoko la sepe.” Ne a re, “A ga o itse gore wena o serorobe, o humanegile, o foufetse, o tlhomola pelo, ga o a ikatega, mme ga o go itse.” Selo se se hutsafatsang sa kinolo ena ya Lokwalo ke . . .

⁵⁹ Fa re bone monna kgotsa motho mo mmileng, yo neng a foufetse ebile a sa ikatega mme a tlhomola pelo ebile a humanegile, moo e ne e tlaa bo e le po—pono e e boitshegang. Ga go ope fa e se yo o tlaa tabogelang kwa go bone ka bonako jaaka ba ne ba ka kgona, mme ba re, “Tsala, ga o a ikatega. O tshwanetse—o tshwanetse . . . O tsotse. Tsena, ka bonako, mme—mme—mme mpe ke go needle diaparo dingwe. Mme ke tlaa go isa golo gongwe go bona fa nka bona ngaka, gore ba kgone go tsosolosa pono ya gago,” kgotsa ba leke go direla motho yo sengwe.

⁶⁰ Go ka tweng fa o ne o kopane le motho yo o ntseng jaaka yoo, mme ba ne ba tlaa retologela ko go wena mme ba go bolelele gore o thkomele tse e leng ditsagago? Ga ba itse ebile gore ba mo seemong seo. Jaanong fa o le ka tsela eo, mme o go itse, ga go maswe thata. Fela fa o le ka tsela eo, mme o sa go itse, moo ke karolo e e maswe. O ka se kgone go ba bolelala.

⁶¹ Mme Lekwalo lena le tshwanetse le diragatswe, jaaka Dikwalo tsotlh di tshwanetse di diragatswe. Baebele e rile sena e tlaa nna seemo mo metlheng ya bofelo. Mme ba ganne Jesu, mme O ne a le ka fa ntle ga kereke, a leka go tsena. Ba go ganne, fela go tlhaloganyega mothofo jaaka Moheberegoy monnye yona a dirile. Mme ena e ne e le kereke ya Baditshaba, kereke ya Monyadwi, e bileditswe ntle, e e bidiwang go twe “kereke ya Bokeresete” mo metlheng ya bofelo, fela ba ne ba Mo ntshetsa kwa ntle lebaka le le tshwanang le rakgwebo yona wa monana wa Moheberegoy neng a Mo tlhanogela. Tlhawatlhwya e ne e le kgolo thata. Ba ne ba sa kgone go Go amogela.

⁶² Baebele e ne ya bua fano gore ba ne ba “humile,” ne ya re ba “ne ba sena lethoko la sepe.” Mosimanyana yona o ne a humile, a sena lethoko la sepe. “Re lekoko le le siameng thata le le nang le ditaolo tse dikgolo di bopilwe. Re na le bokaulengwe. Re na le gotlhe *mona, mole*, kgotsa mo *gongwe*. Re nnile le ditumelo tsa rona tsa kereke dingwaga di le makgolo. Re tlhomame. Ga re na lethoko la sepe. O sekwa re bolelala sepe ka ga Gone!”

⁶³ Sental, moo ke boitsholo jo bo mabela go feta go na le jo mogoma yona wa monana a bo tsereng. Ga a a ka a tsaya mohuta oo wa boitsholo. Baebele ne ya re, gore, “Jesu ne a leba mo go ene mme a mo rata.”

⁶⁴ Ke a ipotsa gompieno, fa mo gare ga tlhakatlhakano yotlh ya rona le selefatshe sa rona, mme le fa go ntse jalo re leka go tshola boipobolo jwa rona jwa Bokeresete, fa e se lorato la Modimo le le patikang bodiredi go nna mo botlhabanelong. Ke a ipotsa fa e se selo se se tshwanang, jaaka fano re Mo fitlhela a kokota fa mojakong, a leka go tsena. Jaanong re fitlhela dilo tsena, tsone gotlhe go ralala dipaka, go nnile go le ka tsela ena.

⁶⁵ Jaanong, go boloka nako, go bua ka ga tumalano ya tshireletso gape, mme nna fela ke go lo sobokela nakwana fela.

⁶⁶ Jaanong mosimane yona yo o humileng, ga a a ka a kopa go ipataganya le kereke ya Gagwe. O—o ne a le leloko la kereke. Go ne ga go netefatsa.

⁶⁷ Jesu ne a mo raya a re, “Tshegetsa ditaelo. Wena o a di itse. O sekwa dira boaka. O sekwa utswa. O sekwa aka, wa tsietsa. Mme—mme o dire, mme—mme o tloge o tlote rraago le mmaago.”

⁶⁸ Mme mogoma yona wa monana o ne a netefatsa gore e ne e le mo—mosimane yo o siameng thata, yo o rutilweng, eseng fela bangwe ba re tlaa ba bitsang gompieno, tso—tsotsi. O ne

a le mohuta o o siameng wa mosimane, yo neng a godisiwa mo lelwapeng le le siameng. O ne a re, “Mong wa me, ke dirile tsena esale ke le mosimane, botshelo jotlhe jwa me.” Lo a bona, go ne go supegetsa gore batsadi ba gagwe e ne e le batsadi ba ba siameng thata. Ba gagwe ba ne ba ya kwa kerekeng e e neng e dumela mo go tshegetseng ditaolo. Fela le fa go ntse jalo, mo kerekeng, go tshegetsaa ditaelo, go ne go santse go sa arabe se a se boneng mo go Jesu. O ne a itse.

⁶⁹ Ka tumelo ya rona ya kereke le kereke ya rona, le go tshegetsa ditaolo, go santse go sa re neye Botshelo jo Bosakhutleng. Ga go a ka ga dira ka nako eo, le gone ga go go dire gompieno. Go na le sengwe se o tshwanetseng go se dira.

⁷⁰ Jaanong, re fitlhela gore e ne e se ka ntlha ya gore o ne a se leloko la kereke. E ne e se ka gore o ne a sa siama ka fa maitsholong. O ne a ntse jalo.

⁷¹ Fela re ka nna leloko la kereke, mme ra siama mo maitsholong, ra bo re santse re sa amogele Botshelo jo Bosakhutleng. Eseng go itse Lefoko; bangwe ba bona ke baithuti ba dithuto tsa bodumedi le ditumelo, le baithuti, le baruti ba sekolo sa Letsatsi la Tshipi, baranodi ba Baebele, fela moo ga go kae sepe. Satane o itse Baebele eo botoka go na le ope wa rona. Baebele e rile, “Go Mo itse ke Botshelo,” eseng go itse Lefoko. “Go Mo itse ke Botshelo.” Satane le ene o a dumela ebile o a roroma. Fela re tshwanetse re nne le maitemogelo a loso, phitlho, le tsogo, go tloga botshelong jwa rona jwa kgale, go ya Botshelong jo bosa jo bo tllang mo go Keresete. Bo tla fela ka Mowa o o Boitshepo, Botshelo jo bosa.

⁷² Jaanong a re tlhotlhomiseng bangwe ba batho bana go fologa go ralala dipaka, ba ba neng ba tshotse tumalano ena ya tshireletso, mme re bone a kana e a duela kgotsa nnyaya. Fong ke tlaa rata fela go lo tlisa, jaaka ke lo boleletse ko tshimologong, gore o tshwanetse o lope kgakololo mo mongweng fa o ile go dira peeletso; o batlisise se se diragalang, gore ke eng, a e duela sentle. O tshwanetse o dire seo mo kgwebong ya gago. Ke batla go bua ka ga bangwe ba batshodi ba tumalano ena ya tshireletso.

⁷³ Ke tlisa mo kelotlhokong ya lona, bosigong jono, morago ko go Genesi, ko moporfeting ka leina la ga Noa. Le fa a ne a lekilwe ka tsela nngwe le nngwe e a neng a ka kgona go dirwa, mo tseleng nngwe le nngwe e Satane a neng a ka kgona go mo leka, go mo dira latlhe tumalano eo ya tshireletso; fela Noa o ne a tshotse tsholofetso ya Modimo, tumalano ya tshireletso ya Botshelo, ka gore Modimo o ne a mmoleletse gore sengwe le sengwe ko ntle ga areka eo se tlaa senngwa, mme le fa go ne go lebega ekete ga go a tlwaelesega ko bathong ba ba akanyang segompieno ba motlha wa gagwe.

⁷⁴ Seo ke se se dirang Efangedi gompieno. Ke go sa tlwaelesega, ka gore Modimo ga a a tlwaelesega. Lefoko la Gagwe le

phuthololwa ka go sa tlwaelesega mo go se rona nako tse dingwe re Le dirang le se phutholole.

⁷⁵ Fela, jaaka ke buile pele, Modimo ga a tlhoke ope go phutholola Lefoko la Gagwe. O dira phuthololo e e Leng ya Gagwe ka—ka go diragatsa dilo tse A rileng O tlaa di dira. O phutholola Lefoko le e Leng la Gagwe. Ga a tlhoke phuthololo ya rona. Gone ke, phuthololo ya rona ke dikakanyo tsa rona tse diirlweng ke motho tse re di tsenyang le Lone.

⁷⁶ Fa Modimo a ne a re, “A go nne le lesedi,” mme go ne ga nna le lesedi. Moo ga go tlhoke phuthololo epe.

⁷⁷ Modimo ne a re, “Kgarebane e tlaa ithwala,” mme e ne ya dira. Moo ga go tlhoke phuthololo epe.

⁷⁸ Jesu ne a re, “Morwa motho o ya golo ko Jerusalema mme a neelwe ka mo diatleng tsa batho ba ba boleo. Ba tlaa Mmapola, mme mo go la boraro O tlaa tsoga gape.” Moo ga go tlhoke phuthololo epe.

⁷⁹ O ne a re, “Ka lobakanyana mme lefatshe ga le tle go tlhola le Mpona; le fa go le jalo lona lo tlaa Mpona, gonne Ke tlaa bo ke na le lona, le e leng mo go lona, go ya bokhutlong jwa paka, go ya kwa bofelelong.” O fano. Ga go tlhoke phuthololo epe. Ke tsholofetso ya Gagwe.

⁸⁰ “Ditiro tse Ke di dirang o tla di dira le ene. Yo o dumelang mo go Nna, ditiro tse Ke di dirang o tla di dira le ene.” Moo go fitlhelwa mo go Moitshepi Johane 14:12. Mme re a itse gore moo ke nnete, jalo he ga go tlhoke phuthololo epe.

⁸¹ Noa, ka Lefoko la Modimo, ne a tshwarelela mo go Lone, ka gore o ne a le yo o nang le mokwalo wa tumalano ya tshireletso ya inshorensen ya Botshelo, tlhomamiso ya Botshelo. O ne a tshotse mokwalo wa tumalano ya tshireletso. Mme o ne a le moemedi wa mokwalo wa tumalano ya tshireletso, mme o ne a tswela gongwe le gongwe. Fela ka gore go ne go sa dumelwe ke ba le bantsi, o ne a sa kgone go dira gore ope a go tshwarelele, e le lelwapa le e leng la gagwe fela. O ne a le... Megopolis le dikakanyo tsa gagwe—tsa gagwe di ne di lebega okare di ne di le tsa bogologolo, mo bathong. Go ne okare gone go kgathlanong le go akanya ga boranyane ga letsatsi. “Dipula di fologa ko legodimong.”

⁸² E ne e ise e ne mo lefatsheng, lo a gakologelwa. Lefatshe le ne le ema le tlhamaletse. Re kgona go rurifatsa seo gompieno, gore lone gangwe le ne le ema ka tsela eo. Mme Modimo o ne a nosetsa dimela ka nosetso, go tswa metswedding mo lefatsheng.

⁸³ Jaanong maranyane, mo motlheng oo, bone kooteng ba ne ba le bophethakapejana go feta jaaka ba ntse jaanong, ka gore ba ne ba aga disifinksi le diphiramiti, le—le jalo jalo, dilo tse re neng re ka se kgone go leka go di dira gompieno. Ga re na dithata dipe tse di ka—di ka kgonang go go dira, fela ba ne ba go aga. Mme ke gopola gore gongwe ba ne ba fula ngwedi ka makhubu a marang

a seromamowa kgotsa le fa e le eng se ba neng ba na naso mo motlheng oo.

⁸⁴ Jesu ne a re, “Jaaka go ne go ntse mo metlheng ya ga Noa,” tlhabologo e nngwe e e tshwantshitsweng le seo, “go tla nna jalo mo go tleng ga Morwa motho.”

⁸⁵ Re bona fano sešeng kwa ba neng ba epolola tsamaiso ya didiriso tsa metsi tsa segompieno fano mo Mexico ya kgale, ga ba na ditso dipe tsa gone, gotlhelele. Lo a bona, go ka nna ga bo go ne go le mo pakeng nngwe e e fetileng.

⁸⁶ Jesu ne a re, “Jaaka go ne go ntse mo motlheng oo,” banna ba e leng bophethakapejana, ba ba botlhale. Fela fa go ne go ntse jalo, fong go ne go tlaa nna le mokwalo wa tumalano ya tshireletso ya Botshelo e e diretsweng batho. O ne a rialo.

⁸⁷ Mme, Noa, a ka nna a se kgone go tlhalosa. Jaaka maranyane a buile, “Re ka tsaya didiriswi ra bo re netefatsa gore ga go na pula ko godimo kwa. Rra, wena o a tsenwa.” Fela o ne a santse a itse gore Lentswe le le buileng nae e ne e le Modimo.

⁸⁸ Jalo he fa Modimo a ne a rile, “Go ne go na le metsi a tswa ko godimo,” le fa go ne go sena metsi, Modimo ke Elohim, Ene yo o itshedisang. Ene ke Ene yo o kgonang tsotlhie. Fa A ne a re, “Go ka nna le metsi ko godimo kwa,” O nonofile go baya metsi golo koo, go tshegetsa Lefoko la Gagwe.

⁸⁹ Rraetsho Aborahame, yo e leng gore ke rraagwe ditšhabatšhaba. Fa go diragala gore go bo go na le batho ba Majuta ba ntse gaufi, ba ba ipotsang ka fa Baditšhaba ba neng ba tlisiwa mo teng ka teng, Aborahame o ne a le rraagwe ditšhabatšhaba. “Mme ga a a ka a thetheekelela tsholofetso ya Modimo ka tumologo.” O ne a tshotse mokwalo wa tumalano ya tshireletso gape. Modimo o ne a mo diretse tsholofetso, go nna rraagwe ditšhabatšhaba; eseng fela ditšhaba tsa Bahebere, fela ditšhaba tse dingwe, tse a neng a tlaa nna rra wa tsone.

⁹⁰ Lemogang, jaaka a dirile, tsholofetso e Modimo a e mo Neileng e ne e le e e khakhabelang, e e feteletseng. O ne a le dingwaga di le masome a supa le botlhano, mme Sara o ne a le masome a marataro le botlhano, pele ga a ne a amogela tsholofetso. Fela o ne a itomolola mo badumologing, ka gore o ne a itse gore e ne e le mojaboswa wa tshiamo ka thato ya Modimo, mme go sa kgathalesege gore go tsere lobaka lo lo kae!

⁹¹ Kooteng kgwedi ya ntlha e ne ya feta mme o ne a raya Sara a re, “O ikutlwang?”

“Ga go na pharologanyo.”

⁹² Ne a re, “Re tlaa nna le lesea, le fa go ntse jalo. Modimo o buile jalo. Tswelela pele mme o dire dibutse tsa lesea. Baakanya sengwe le sengwe. Modimo o rile re tlaa nna le lone. Moo go a go tsepamisa.”

Ngwaga wa ntlha o ne wa feta. “Moratwi, o ikutlwang?”

“Ga go a farologana.”

⁹³ “Sentine, go ile go nna motlholo o mogolo go feta thata go na le fa go ne go diragetse ka kgwedi ya nttha.”

⁹⁴ Lo a bona, o ne a le go ka nna dingwaga di le lesome a fetile go khutla go aparelwa ke kgwedi nako e tsholofetso e neng e neetswe. Ba ne ba sena bana bape. Mosadi o ne a le moopa, le monna o ne a sena nonofo ya go dira bana. Jalo he bone... Fela o ne a santse a tshotse mokwalo oo wa tumalano ya tshireletso, ka gore e ne e le Lefoko la Modimo, tsholofetso. O ne a sa tle go kgaogana le yone. Mme Baebele ne ya re, gore, “Aborahame ga a a ka a thetheekelela tsholofetso ya Modimo ka tumologo; fela o ne a nonofile, a neela Modimo pako; a itse sena, gore, O nonofile go dira seo se A soloeditseng go se dira.” Jalo he ngwana o ne a tsalwa, ka gore o ne a tshotse mo—mokwalo wa tumalano ya tshireletso.

⁹⁵ Noa o ne a tshotse mokwalo wa gagwe wa tumalano ya tshireletso, mme e ne ya boloka botshelo jwa gagwe. Seo e ne e le tuelo. Eseng fela botshelo jwa gagwe, fela botshelo jwa lelwapa la gagwe; bo dueletswe, ka go ba pholosa.

⁹⁶ A re bueng le mmeletsi yo mongwe mo inshorenseng ena ya Botshelo jo Bosakhutleng. Daniele moporofeti, nako e jaaka re ne re tlaa go bitsa... Fa lo tlaa go itswarela, jaaka tlhaloso ya selefatshe; ga ke a tshwanelo go go dira, ke a gopola, fano fa felong ga therelo. Ke tsela e le nosi e ke itseng go go dira, “fa diphatsa di le ko tlase.” Kgosi Nebukatenesare o ne a tsene mme a tsere bana ba Iseraele ka gore ba ne ba tlogetse kgakala le Modimo. Ba ne ba dirile; ba santse ba dira ditlhabelo tsotlhe tsa bone.

⁹⁷ Fa Modimo a ne a ba kopa gore ba ntshe dikwana le dipoo, le jalo jalo. Monna, Mojuta yo o siameng thata, ne a tsamaya a fologa mo tseleng, ka pelesa e e nonneng kgotsa—kgotsa—kgotsa kwanyana fa tlase ga letsogo la gagwe. Ka letsatsi la tetlanyo, o ne a ya golo koo go e ntshetsa boleo jwa gagwe. O ne a le peloephepa fa a ne a bolaya kwana eo, mme moperesiti o ne a e tlhaba. Mme o ne a baya diatla tsa gagwe mo go yone, a neng a itse gore botshelo bo ne bo tseilwe go boloka botshelo jwa gagwe. O ne a le peloephepa mo go gone. Mme fa fela a ne a le peloephepa, go ne go siame. Fela nako e ne ya tla fa go neng ga fetoga go nna ngwao ya lelwapa. Fong Modimo ne a re, O ne a romela moporofeti mo tiragalang, ka leina la ga Isaia, O ne a re, “Dithabelo tsa lona, meletlo e e masisi, di a nkga mo nkong ya Me.”

⁹⁸ Ke kwa rona batho re gorogileng gone. Re ipatagantse le kereke. Mo e leng gore, go siame, re dira dilo tseo. Fela, wa re, a o Mokeresete? “Ke Momethodisti. Ke Mobaptisti. Ke Mopresbitheriene, Mopentekoste, kgotsa sengwe se sele.” Ke ngwao. Ga go sa tlhola go na le go tsena, ka bopeloephepa, ga go

sa tlhole. Ga ba na go tswelela ba ya kwa godimo, ba dumalana le Dikwalo le dilo. Bona ba tshela fela ka tsela epe e ba batlang go dira. Fa ba na le modisa phuthego a leka go ba lolamisa, ba a mo ntsha. Ga ba na sepe se se amangan nae fa a sa kgone go tlisa Hollywood mo kerekeng; meletlo, meletlo ya bankho, dilalelo tsa mero, le sengwe le sengwe se sele; go lettelelwe basadi ba itshole ka tsela epe e ba batlang go dira, le go apara ka tsela epe e ba e batlang, ka fa maitsholong, sengwe le sengwe. Topo ya thobalano e fetoga go nna kgane—kganelo ya segompieno. Ke matlhabisa ditlhong.

⁹⁹ Jesu o ne a re, ko mosading yole. O ka nna wa bo o iphaphile jaaka o ka kgona go nna ka gone, fela o tlaa arabela boakafadi ko letsatsing la katlholo, wena o aparang diaparo tseo. Jesu ne a re, “Le fa e le mang yo o lebang mosadi, go mo iphetlhela, o setse a dirile boaka le ene mo pelong ya gagwe.” Mme go sa kgathalesege ka fa o senang molato ka gone, moleofi yoo o tlaa arabela boakafadi, mme ke wena yo o bo tlisitseng. Lona Bakeresete, a ga lo tlhajwe ke ditlhong? Lo tshwanetse lo itshware jaaka barwadi ba Modimo.

¹⁰⁰ Mme lona banna, maloko a kereke, batiakone, le e leng ko badireding, ba lo tlaa lettelelang basadi ba lona go dira seo, lo tshwanetse lo nne bomorwa Modimo. Moo ga go utlwale jaaka maitsholo a morwa Modimo ka tlholego ya ga Rraagwe mo go ene. O tshaba go bua sengwe ka gore lekgotla le tlaa go koba. Go ntse jalo.

¹⁰¹ Daniele o ne a ikaelela mo pelong ya gagwe gore o ne a sa tle go leswefatsa peeletso ya gagwe. O ne a ikaelela, “Go sa kgathalesege se lefatshe, ka fa kgosi e neng e huma ka gone, le ka foo a lekang thata go ntlosa ke ye mo dilong tsa lefatshe, Ga ke tle go go dira. Ga ke tle go leswefatsa peeletso ya me.”

¹⁰² Ao tlhe lefatshe la Bokeresete, lo se leswefatse peeletso ya lona e lo e dirileng mo Botshelong jo Bosakhutleng. Lo tlaa e kgotleta.

¹⁰³ Daniele o ne a ikaelela gore ga a tle go go dira. E ne ya mo tlisetsa dipolo, ka go boloka botshelo jwa gagwe fa a ne a latlhelwa ka mo serubing sa ditau. Peeletso ya gagwe ka mmannete e ne ya mo duela.

¹⁰⁴ Bana ba Bahebere ba ne ba ikaeletse gore ba ne ba sa tle go obamela modingwana wa diseto. Mme go ne ga duela, ka go boloka botshelo jwa bone mo leubelong le le gotetseng.

¹⁰⁵ Fong Simone Petoro o ne a tla, Mofarasai yo o siameng thata yo o neng a rutilwe ke rraagwe, gore motlha o ne o tlaa tla gore—gore go tlaa tla Mesia. Gothe go ralala dipaka, batho ba Majuta ba ne ba go soloftsetse. Mme ga go pelaelo epe gore rraagwe o ne a mmoleletse, “Morwa . . .” Ke—ke ne ka bala polelonyana nako nngwe, ka ga yone, e ka tswa e ne e le kinane. Ga ke re e ne e le ya popota.

¹⁰⁶ Fela o ne a re, “Ke ntse ke lebeletse nako ya ga Mesia yo o tlang.” Mme ne a re, “Ke—ke—ke itse gore pele ga nako eo e tla, go tlaa nna le mehuta yotlhe ya ditumelwana tse di sokameng, dilo tsa maaka tse di diragalang. Fela, morwa, jaaka Mohebere, re rutilwe, jaaka Bahebere, go dumela baporofeti ba rona, gonne Lefoko la Morena le tla ko baporofeting, mme ena a le nosi. Morena ne a re, ‘Ga ke dire sepe ntleng le fa ke go senolela baporofeti ba Me pele.’ Mme Mesia yona, go ya ka Moshe, ‘Morena Modimo wa lona o tlaa lo tsosetsa moporofeti mo gare ga lona, wa bakaulengwe ba lona, yo o tshwanang le nna.’ Mme Mesia ga a tle go nna morutintshi. Ena ga a tle go nna lekoko. O tlaa bo a le moporofeti, mme Lefoko la Morena le tlaa bo le na Nae.”

Anterea o ne a utlwile Johane a bua ka ga yo o jaana yo o neng a tla e le, “Mokolobetsi.”

¹⁰⁷ Fela foo, letsatsi lengwe, Simone ka boene ne a tsamaela ka mo Bolengtengeng jwa ga Jesu yona wa Nasaretha. Mme ka bonako fa A sena go leba mo go ena, O ne a re, “Leina la gago ke Simone, mme wena o morwa Jonase.” O ne a tsaya mokwalo wa tumalano ya tshireletso gone ka bonako. O ne a itse gore yoo e ne e le Mesia. Moo e ne e le Lekwalo le le rurifaditsweng la motlha wa gagwe, Mesia. Ba bangwe ba paletswe jang go go bona?

¹⁰⁸ Go ne go na le mongwe yo neng a eme, leina la Filipo, yo neng a tsamaya dimmaele di ka nna lesome le botlhano go dikologa thaba, ko go mogoma yo neng a bidiwa Nathaniele. Ba ne ba nnile le dithuto tsa Baebele ga mmogo. Gongwe puisanyo ya bona e ne e le sengwe se se jaaka sena, jaaka a ne a mo fitlhela fa tlase ga setlhare, a rapela. O ne a re, “Nathaniele.” Jaaka go sololetswe, e leng lejentlelemane le le neng le latela Jesu; motho ope yo o latelang Jesu o tlaa nna lejentlelemane. Jalo he o ne a mo fitlhela a rapela; o—o ne a leta lobakanyana. Fela lo a lemoga, ga a a ka a bua le ena ka ga ditlhare tsa gagwe tsa motlhware kgotsa jalo jalo. O ne a ya ka tlhamallo ko letshwaong, “Tlaya, o bone Yo re mmoneng: Jesu wa Nasaretha, morwa Josefa.”

Ne a re, “Jaanong, a go ka nna le sengwe se se molemo se se ka tswang mo Nasaretha?”

O ne a re, “Tlaya, o bone.”

¹⁰⁹ Eo ke karabo e e botoka go gaisa e motho ope a ka e neelang yo mongwe. “Tlaya, iponele. O sekwa dula gae mme wa kgala. Tlaya, o go tlhotlhomise ka bowena.”

¹¹⁰ Mo tseleng go dikologa, puisanyo ya bona e ka tswa e ne e le jaana. Gongwe Nathaniele ne a re, “O a itse, re ntse re lebeletse Mesia, ka dingwaga. O a itse, Filipo, ka fa re ithutileng sena. Goreng, ke a dumela fa Mesia a tla, Modimo o tlaa goga differwana ko Legodimong mme a letlelele differwana tse ditona di fologe, bogato jwa direpodi gone go tswelela (ya rona) jarata e tona ya tempele kwa Khaifase moperesiti yo mogolo wa rona

a leng gone, mme O tlaa re, ‘Ke fano.’’ Lo a bona? Fela eo ga se tsela e Lekwalo le rileng O ne a tlaa tla ka yone.

¹¹¹ O tlaa tla fela ka tsela e Lekwalo le buileng ka yone. O ne a tla mo moporofeting fela jaaka Moshe a ne a ntse ka gone, motho yo o tlwaelesegileng, modisa dinku.

¹¹² Lemogang, mme erile a tthatlogela ka mo Bolengtengeng jwa ga Mesia, mme O ne a le mo moleng kgotsa a rapelela balwetsi, kgotsa le fa e le eng se A neng a se dira. Re fitlhela gore Mesia o a mo leba, mme a re, “Bonang Moiseraele yo mo go ena go senang boferefere bope.”

¹¹³ Jaanong lo ka nna lwa akanya gore e ne e le ka gore o ne a apere ka tsela eo. Fela, gakologelwang, batho botlhe ba Botlhabatsatsi ba apara go tshwana, sethathelela tlhogo le ditedu, jalo jalo. Lo a gakologelwa, Jesu ne a tsamaya le bona, le ene, mo tseleng go ya Emaose, letsatsi lotlhe le le leeble, morago ga tsogo ya Gagwe, mme ba ne ebile ba sa Mo itse. O ne a apere ka tsela e e tshwanang.

¹¹⁴ Jalo he re fitlhela gore mo Bolengtengeng jo bogolo jona jwa Gagwe, o ne a re, “Rabi.” Mohebere yo o siameng thata yona wa monana ne a re, “Rabi, O nkitsile leng? O kile wa nkitse leng, wa nkitse gore ke mo—Moiseraele, le boammaaruri, tumo e ke nang nayo? Ga o ise o mpone pele. O nkitsile jang?”

¹¹⁵ Mme O ne a re, “Pele ga Filipo a go bitsa, fa o ne o le fa tlase ga setlhare, Ke go bone.”

¹¹⁶ O ne a tsaya mokwalo wa tumalano ya tshireletso. Ne a wela fa dinaong tsa Gagwe jaaka mogoma yo mongwe yona wa monana a dirile, ne a re, “Rabi, wena o Morwa Modimo. Wena o Kgosi ya Iseraele.” Leina la gagwe ke le le sa sweng gompieno.

¹¹⁷ Go na le mosadi yo monnye, yo nka nnang ka bua ka ga ena ka ntlha ya bahumagadi ba ba emeng gaufi. Mohumagadi yo monnye yona o ne a se jaaka lona. O ne a na le po—pono molato ka ntlha ya maitsholo a maswe kgatlhanong le ene, le kereke. Gongwe ngwana mongwe wa monana yo neng a kobetswe ntle kwa mmileng, ka phoso. Gongwe batsadi ba gagwe ba ne ba sa mo tlhokomele. O ne a le halofo ya Mojuta le Moditshaba; o ne a le Mosamarea.

¹¹⁸ Gakologelwang, go na le ditshika fela di le tharo tsa batho, fa Lekwalo la rona le nepile.

¹¹⁹ Mme Modimo a intshwarele ka ntlha ya le e leng go umaka ka ga “fa” Le nepile. Lone le nepile. Ke Modimo ka Sebele. “Ko tshimologong go ne go le Lefoko, mme Lefoko le ne le na le Modimo, mme Lefoko e ne e le Modimo. Mme Lefoko le ne la dirwa nama la bo le aga mo gare.” “Yo o tshwanang maabane, gompieno, le ka bosaeng kae.”

Jalo he mohumagadi yo monnye yona a neng a kobilwe.

¹²⁰ Santlha, ke ka nna ka tlhalosa batho ba ga Hame, Sheme le Jafethe. Jaanong rona, Baditshaba, re ne re le baheitane mo metlheng eo, re ne re obamela medimo ya diseto, fela Mojuta le Moditshaba ba ne ba soloftse Mesia. Mme O tla fela ko go bao ba ba Mo soloftsetseng.

¹²¹ Nako tse dingwe gompieno, re bua gore re a Mo senka, mme re tsenye didikadike le dibilione tsa didolara mo dilong, mme lo aga dikago le dilo. Ke a ipotsa. Mme baanamisa tumelo ba bolawa ke tlala mo botlhabanelong, ke a ba itse, golo koo bosigong jono ba rera, ba sena para ya ditlhako. Re tsenya dimilione le dimilione tsa didolara ko matlakaleng, mme foo, gobaneng, ditiro tsa rona di kgala bopaki jwa rona.

¹²² Fela fano mothepa yona, jaaka re mo itse, o ne a le Mosamarea. Jesu o ne a le mo tseleng ya Gagwe go ya Jerikho, yo o leng kwa tlase ga Jerusalema. Fela O ne a ya a potonogela kwa Samaria mme a tla kwa motsengmogolo o o bidiwang Saekha, mme a romela barutwa ko teng go reka mofago, dijo. Mme erile ba santse ba tsamaile, mosadi yo monnye yona ne a tla go ga metsi, mme O—O ne a mo raya a re, “Ntlisetse seno.”

¹²³ Mme o ne a leba mo tikologong, a Mmona e le Mojuta, o ne a re, “Ga se tlwaelo gore O tlaa nkopa seo.” Ne a re, “Wena o Mojuta.”

¹²⁴ O ne a re, “Fela fa o ne o itse Yo o neng o bua le ene, o ne o tlaa Nkopa seno. Ke go naya metsi a o sa tleng fano go a ga.”

¹²⁵ Jalo puisanyo e ne ya tswelela, ka ga bodumedi, kwa bofelong O ne a ama botshelo jwa gagwe. O ne a re, “Tsamaya o ye go tsaya monna wa gago mme lo tle fano.”

Mosadi ne a re, “Ga ke na monna.”

¹²⁶ Ne a re, “O boletse boammaaruri. O nnile le ba le batlhano, mme yo o nnang le ena jaanong ga se monna wa gago.”

¹²⁷ Jaanong malatsi a le mmalwa pele ga foo, baruti le borabi ba motlha oo, banna ba ba neng ba tshwanetse ba bo ba itsile botoka, ba ne a re, “Ena ke Beelsebule. O dira seo ka mowa o o bosula.” Ba ne ba tshwanetse go araba ko phuthegong ya bone. Jalo he ba ne ba tlhama, ba re, “Ke mowa o o bosula.”

¹²⁸ Mme Jesu ne a re, “Ke tlaa lo itshwarela seo,” tetlanyo e ne e ise e dirwe. “Fela fa Mowa o o Boitshepo o tlide go dira selo se se tshwanang, go bua kgatlhanong le One ga go kitla go itshwarelw,” mme re a itse go ne ga diragala nako e Tito, morago ga ba sena go gana Mowa o o Boitshepo, Tito o ne a fisa tempele mme a phatlalatsa Bajuta gotlhe gotlhe mo lefatsheng. Mme bona fela jaanong ba phuthega gape, ke go diragatsa Lokwalo.

Jaanong, lemogang, jaanong mothepa yona.

¹²⁹ Fa, Bajuta bao ba ne ba bone seo se dirwa, mme ba O bitsa, “mowa o o bosula, mowa o o itshekologileng,” Baebele ne ya re, “go bitsa Mowa wa Modimo, o dira tiro, Mowa o o

itshekologileng, diabolo,” jaaka sedupe kgotsa motho mongwe yo o bosula.

¹³⁰ Mme foo, ka bonako, mosadi yona o ne a itse mo go farologaneng. Fa A ne a re, “Tsamaya o ye go tsaya monna wa gago.”

O ne a re, “Ga ke na ope.”

¹³¹ O ne a re, “O buile boammaaruri, ka gore o na le ba le batlhano, mme yo o nnang nae, ga se monna wa gago.”

¹³² Lebelelang sena. Ka bonako o ne a re, “Rra, ke lemoga gore O moporofeti.” Gakologelwang, ba ne ba sena baporofeti bape go batlile go le dingwaga di le makgolo a le matlhano. Malaki e ne e le moporofeti wa bofelo wa Mohebere. “Rona, re a itse gore Mesia o etla, mme sena e tlaa nna sesupo sa ga Mesia. Re a itse, fa A tla, sena ke se A tlaa se dirang.”

Jesu ne a re, “Ke nna Ena yo o buang le wena.”

¹³³ Mme o ne a tsaya mokwalo wa tumalano ya tshireletso. Uh-huh. Mme ko motseng o ne a ya, go phatlalatsa Dikgang tse di molemo, gore o ne a bone Mesia. O ne a na le Botshelo jo Bosakhutleng ka gore o ne a dumetse mo go Ena. O ne a itse jang? O ne a bona sekao sa Lekwalo se bonagaditswe ke Ena.

¹³⁴ “Re itse seo, nako e Mesia a tlang. Dingwaga di le makgolo a le manê ga re ise re nne le moporofeti, mme, fa A tla, yoo e tlaa bo e le monna yo o latelang mo tiragalong. Jaanong fa A tla, re tlaa Mo itse, mme O tshwanetse go dira selo se se tshwanang seo.”

¹³⁵ Ne a re, “Ke nna Ene.” O ne a tsaya mokwalo wa tumalano ya tshireletso. O ne a na le kgatlhego mo go yone.

¹³⁶ Nikodimo. Metsotso e le mmalwa, mo go tswaleng jaanong. Nikodimo, rabi, monna wa dingwaga di ka nna masome a ferabobedi. O ne a tlhotlheletsegile go dumela gore go ne go na le sengwe ka ga Jesu se se neng se farologane le batho ba bangwe, jalo he o ne a batla mokwalo wa tumalano ya tshireletso. Jalo he o ne a tla go le bosigo, ka ntlha ya mokwalo wa tumalano ya tshireletso, mme o ne a fitlhela polokelo ya madi e buletswe tiro. Uh-huh.

¹³⁷ E tlhola e bulegile. E butswe mo modirong wa dijo. E bulegile golo foo mo mmileng. E bulegile gongwe le gongwe kwa go nang le mongwe yo o ipaakanyeditseng go dira kgwebo, mokwalo ona wa tumalano ya tshireletso le ene yo o e tshwereng.

O ne a fitlhela gore polokelo ya madi e butswe. O ne a tsaya mokwalo wa tumalano ya tshireletso.

¹³⁸ Jaanong re a itse, mo go Luka 24:49, morago ga Jesu a se na go tlhopha barutwa ba Gagwe, ba ne ba le ba ba tshotseng mokwalo wa tumalano ya tshireletso ya Botshelo jo Bosakhutleng. Jalo he jaanong, lo a itse, mo mokwalong wa tumalano e e tlwaelesegileng ya inshorensen, ba tlhola ba

duela merokotso. Jalo he ba ne ba setse ba amogetswe mme ba tlhophilwe ke Jesu, jalo he ba ne ba ya golo ko Jerusalema, ba letile go fitlhela Letsatsi la Pentekoste, go amogela merokotso ya bone. Mme go ne ga duela, ka kolobetso ya Mowa o o Boitshepo, le thata ya go bonatsa Jesu Keresete.

¹³⁹ Methodisti, Baptisti, Presbitheriene, Othodokse, le fa e le mang yo o leng ene, ba lo ithayang gore lo Bakeresete, goreng lo sa dire se se tshwanang? O dumela mo go Jesu Keresete mme o fetoga go nna leloko la kereke, goreng o sa ye golo ko Pentekosteng, o bone merokotso ya gago, thata ya Mowa o o Boitshepo! Bone ba ba nang le mokwalo wa tumalano ya tshireletso ba ne ba e tsaya. O ka kgona, le wena, fa o go dumela ebile o go dumela ka mmannete.

¹⁴⁰ Petoro a bua le bone, ne a re, “Tsholofetso ke ya lona le bana ba lona, le bone ba ba kwa kgakala, le e leng ba bantsi ba Morena Modimo wa rona a tla ba bitsang.” Ba ne ba batla go itse se ba tshwanetseng go se dira. O ne a re, “Ikotlhaeng, mongwe le mongwe wa lona, mme lo kolobetsweng ka Leina la Jesu Keresete gore lo itshwarelwae maleo a lona, mme lo tla amogela neo ya Mowa o o Boitshepo.” E ne e le tsholofetso.

¹⁴¹ Jalo he fa wena o le fela moipobodi, bosigong jono, mme o ise o amogelete merokotso ya gago, goreng o sa tlise mokwalo wa gago wa tumalano ya tshireletso, bosigong jono, mpe ke go bue le wena sebakanyana. Khubama le nna metsotsa e le mmalwa mme o batlisise fa go se jalo. Nna peloephepa ka ga gone. Go tlaa duela gone jaanong, fa wena ka mmannete o tshotse mokwalo wa tumalano ya tshireletso. O tlaa lemoga mokwalo wa tumalano ya tshireletso, tumelo ya gago, fa o re e mo Modimong. Fa e le mo Modimong le mo Lefokong la Gagwe, mme eseng mo kerekeng nngwe kgotsa tumelong ya kereke ya lekoko, fela o dumela fela mo go Jesu Keresete, go tlaa duela. O itse mokwalo o e Leng wa Gagwe wa tumalano ya tshireletso.

¹⁴² Ke tlisa moanelwa yo mongwe mo teng, fela ka metsotsa e le mmalwa. Go ne go na le Mohebere yo mongwe yo o humileng yo neng a kgatlhantsha Jesu letsatsi lengwe morago ga loso la Gagwe, phitlho, le tsogo.

¹⁴³ Fa e le gore go na le Mohebere fano, bosigong jono, kgotsa le fa e le mang yo o leng ena, Ena a neng a bapotswe ga se seipato sepe fa e se gore o ka kgona go Mo kgatlhantsha gone fano, go tshwana fela le jaaka—jaaka mmusi yo o humileng wa monana a neng a kopana Nae. Fa o batla mokwalo wa tumalano ya tshireletso, Ena o fano go dira kgwebo.

¹⁴⁴ Go ne go na le monna ka leina la ga Saule, mme o ne a rutilwe mo dithutong tsotlhe tse dikgolo le dingwao tsa batho ba gagwe. Gamaliele e ne e le moruti wa gagwe, mongwe wa baruti ba Bahebере ba ba siameng thata ba mothla oo. Mme Saule o ne a tlhoafetse thata ka ga sena, go fitlhela a ne a kgobotleditse

Setefane ka mantswê, kgotsa a supile ka ga Setefane, kgotsa a go dumeleletse. O ne a tshola dijase tsa bao, fa a ne a dumelela, a neng a na le taolo go tswa ko moperesiting yo mogolo go latlhela batho botlhe bao, ba mokwalo oo wa tumalano ya tshireletso, ko kgolegelong, ka gore o ne a boleletswe ke bagolwane ba gagwe, gore, "Monna yona e ne e se moporofeti. Go ne go sena sepe mo Monneng yona fa e se tsela e e tlhamalletseng." Mme o ne a na le makwalo mo dipataneng tsa gagwe, a ya ko tlase, ka gore o ne a utlwile gore go ne go na le bangwe golo ko Damaseko, ba tshotse mokwalo oo wa tumalano ya tshireletso. Mme ba ne ba bone merokotso mo go one, mme ba ne tota ba dira dilo.

¹⁴⁵ Mme moperesiti yo mogolo o ne a mmolelela, "Saule, wena o motlhoafadi. Tsaya taolo ena, mo go nna, fologela koo mme o tshware mongwe le mongwe wa bone, ka gore bone ga se sepe fa e se ba ba sa tlhamallang mo tseleng, ga go sepe mo go bone. Fologa mme o ba bofelele, mme o ba latlhele mo kgolegelong. Fa o tshwanetse go ba bolaya, o ba bolaye, go siame. Yaa go ba tsaya!"

¹⁴⁶ Saule ne a re, "Wena Motlotlegi, rra, rra yo o boitshepo, ke tlaa ya." O ne a fologa.

¹⁴⁷ Mo tseleng ya gagwe a fologa, o ne a tsamaya go ka nna nako ya lesome le motso mo letsatsing, a atamela motsemogolo. Ka tshoganetso, go tswa mo magodimong go ne ga tla Pinagare ya Molelo, ya mo itaya. Mme o ne a emeleta go leba, mme foo go ne go le Pinagare eo ya Molelo fa pele ga gagwe.

¹⁴⁸ Jaanong go le tlhomamisetsa seo. O ne a le Mohebere, mme o ne a ka se ka a obamela sepe kgotsa a bitse sepe Morena, ntleng le fa a ne a itse gore e ne e le Morena. Mme o ne a itse, e le moruti mo tlase ga Gamaliele, gore Moengele wa Morena, yo e neng e le Logose yo neng a tswa mo Modimong, yo e neng e le Keresete yo neng a ba etelela pele go ralala bogare ga naga, o ne a le mo popegong ya Lesedi, Pinagare ya Molelo. Mme erile E mo iteela faatshe, mme a ne a leba ko godimo mme a E bona foo, o ne a re, "Morena." Jaanong, a ka bo a ne a sa bitsa sepe fa e se Leo, Morena. Fela, e leng Mohebere, o ne a itse gore Yoo e ne e le Jehofa. Leo ke lebaka le a neng a na le tshenolo, a neng a kgona go bua gore Jesu wa Kgolagano e Ntšhwa e ne e le Jehofa wa e Kgologolo. Moo e ne e le tshenolo ya gagwe, ka gore o ne a bone Jehofa. Mme o ne a re, "Morena, Wena o Mang?"

¹⁴⁹ O ne a re, "Ke nna Jesu, mme go bokete gore wena o rage ditlhabi." Mme o ne a tsaya mokwalo wa tumalano ya tshireletso.

¹⁵⁰ Tshwantshanyang banna ba babedi ba. Mohebere a le mongwe yo neng a humile yo neng a batla go tshegetsa dingwao tsa bone; yo mongwe yo neng a tlhotlheletsegä go dumela. Mongwe wa bone o ne a Mmona e le motho, gore Modimo o ne a dirwa nama gore a kgone go swa a bo a tlose boleo.

¹⁵¹ Madi a dikwana le dilo, botshelo jo bo neng bo le foo, bo ne bo ka se kgone go tla mo modumeding, ka gore ke botshelo

jwa kwana, ga bo na mowa wa botho mo go jone, botshelo jwa phologolo. Fela mona e ne e le Modimo ka Sebele, mme, re a tloga re tsalwe ke Mowa oo, re barwa le barwadia Modimo, Botshelo jo bo neng bo le mo Setlhabelong sa rona.

Tshwantshanyang banna ba babedi ba.

¹⁵² Ke Go bone go rurifaditswe, gore Modimo o ne a le mo go Keresete. Pinagare ya Molelo e e tshwanang e e neng ya tlisa batho ba Gagwe go ralala bogare ga naga, mme a ba tlisa koo, a ba otla letsatsi lotlhe. Gakologelwang, fa Jesu a ne a le mo lefatsheng, O ne a re, “Ke tswa kwa go Modimo, mme Ke ya kwa go Modimo.” E ne e le Pinagare ya Molelo e e neng ya tsaya bana go ralala bogare ga naga.

¹⁵³ Baebele ne ya bua, gore, “Moše o ne a kaya dikhumo tsa ga Keresete e le matlotlo a magolo go feta ao a Egepeto.” O ne a tlogela Egepeto, go latela Keresete.

¹⁵⁴ Fa A ne a le fano, Pinagare eo ya Molelo e ne e emetswe mo go Ena, Modimo. Ena o ne a re, “Fa Ke sa dire ditiro tsa ga Rrê, ka ntla eo lo se ka lwa Ntumela. Ditiro di lo bolelela se Ke tshwanetseng go se dira. Fa Ke sa dire seo, go raya gore lo seka lwa go dumela. Fela fa lo ka se kgone go Ntumela . . .”

Ba ne ba re, “Wena o—Wena o motho yo o Itirang Modimo.”

¹⁵⁵ Ne a re, “Fa lo sa kgone go Ntumela, ke le Motho, dumelang ditiro. Di supa ka ga Nna.” Lo a bona?

¹⁵⁶ Jaanong, fa A ne a sule, a fitlhilwe, a tsogile, a tlhatlogile, ke yona re Mo fitlhela gape mo Pinagareng eo ya Molelo. O ne a tswa kwa go Modimo, a bo a ya kwa go Modimo.

¹⁵⁷ O santse a le Ene yo o tshwanang, Yo o tshwanang jaanong. Lemogang, go tlhomame, Ene yo o tshwanang yo A neng a le ene.

¹⁵⁸ Mme erile Paulo, kgotsa Saule ka nako eo, a ne a lemoga gore Modimo Jehofa, Pinagare ya Molelo ya Kgolagano e Kgologolo, ne a Ipiditse Jesu, o ne a tsaya mokwalo wa gagwe wa tumalano ya tshireletso. O ne a o ipaakanyeditse yone ka nako eo.

¹⁵⁹ A tshwetso e e phomesegelang ya mmusi yole wa monana! A mo . . . Ka foo a tshwanetseng a bo a . . . Eng, o ne a ka kgona jang go go dira? [Fa go sa theipiwang teng mo theiping—Mor.]

¹⁶⁰ Ke eng se o tlaa se nayang go ananyetsa mowa wa gago wa botho? Morago ga dikago tsotlhe tsa gago, mme o—o go tlogelela masika a gago go di lwela, le sengwe le sengwe, ga tweng ka ga mowa oo wa botho le kwa o ileng go nna gone? Gakologelwa, wena o tlaa bo o le golo gongwe, dingwaga di le dikete go tloga bosigong jono. Ena e ka nna ya bo e le nako ya gore wena o dire tshwetso ya gago.

¹⁶¹ Lemogang a phoso e e dirilweng ka go khakhabuela ya ti- . . . A rakgwe—a rakgwebo yo o tlhomolang pelo yo neng a le ene, go leka go tshwarelela mo ngwaong, fa a ne a netefaleditswe ebile go

rurifaditswe gore Botshelo jo Bosakhutleng e ne e le Jona, mme o ne a paka mo go tshwanang ka go botsa Jesu ka ga gone.

¹⁶² Paulo o ne a go amogela. Re itse ka fa a neng a tswa ka gone. Jaaka batho ba motlha o, ba rata mogopol o o atlegileng, le thoriso ya motho mo boemong jwa tlotlo ya Modimo. Paulo o ne a sa kgathalele pako ya motho. O ne a batla tlotlo ya Modimo.

¹⁶³ A re late leng mosimanyana yona motsotsa fela pele ga re tswala. A re mo late leng. Re fitlhela lefelo le le late lang, gore, mogoma yona wa monana, o itse se se mo diragaletseng? Ga a a ka a fetoga go nna mohumanegi, ka ntlha ya go dira sena. Ga a a ka a fetoga go nna mokopi mo mmileng. O ne a kokotlegela ka dithoto. O ne a ganne tšhono.

¹⁶⁴ Makgetlo a le mantsi, batho gompieno ba tlaa tshega mme ba tlaope Mowa o o Boitshepo, ba tloge ba tswelele ba bo ba kokotlelele mo kgwebong ya bone. Lo a itse, itshwareleng tlhaloso ena . . . Fela fa bone ba tshega, ba reng, “Goreng, lebang, nna! Fa go na le sengwe mo go Gone, lo a bona, goreng, go ne go tlaa ntiragalela, sengwe se ne se tlaa ntiragalela.”

¹⁶⁵ Lo a itse, go na le se—se—seane, gore, “Dimatla di tlaa tsamaya ka dithhako tse di tsentsweng dipekere kwa Baengele ba boifang go gata gone.”

¹⁶⁶ Mmusi yona wa monana ka tsela e e bonagalang o dirile seo. Lo a bona? O ne a dira pho—phoso e e boitshegang, mme re fitlhela gore ga e ise e ko e kgoreletse kgwebo ya gagwe. O ne a kokotlegela. O ne a atlega go feta, a na le dithoto tse dints. Re fitlhela gore, morago ga sebaka, gore o ne a nnile mogolo thata go fitlhela ebile a ne a tshwanelo go aga difala tse di ntšhwa go baya dilwana tsa gagwe mo teng.

¹⁶⁷ Mme ka gore kereke e ganne Mowa o o Boitshepo, mo metlheng ena ya bofelo, yone e kokotlegetse. Mme jaanong lo ya ka mo Lekgotleng la Ekumenikele, fela totatota se Baebele e rileng lo tlaa se dira. Jaanong lona ka mmannete lo Laodikea, “lo humile ebile lo kokotlegetse ka dithoto,” fela totatota jaaka lekau lele le ne le ntse ka gone.

¹⁶⁸ O ne a le setshwantsho sa kereke, a gana. Paulo o ne a le setshwantsho sa e e amogelang. Bone boobabedi ba ne ba na le tšhono, jaaka lo na nayo bosigong jono, mme ke na nayo.

¹⁶⁹ O ne a kokotlegela ka dithoto. Le kereke e jalo, Paka ya Laodikea, e kokotlegetse ka dithoto. Mme gakologelwang, o ne a nna mogolo thata, go fitlhela a ne a tumile thata, go fitlhela le e leng dikgosi tsa lefatsho, batho ba bagolo, ba ne ba simolola go tla. Mme o ne a rulaganya dijo tse dintle tsa morafe, nako nngwe.

¹⁷⁰ Mme go ne go na le motshodi wa mokwalo wa tumalano ya Botshelo jwa Bosakhutleng kwa mmarakeng wa gagwe, mme re fitlhela gore o ne a ntse fa mojakong. Ao, o ne a ka nna a feelela mafofora mangwe kwa go ene. O nnile le tšhono gape, mosupi,

Lasaro a ne a mo pakela. Fela o ne fela a feelela mafofora ko thoko, "Ao, sentle, ke tlaa leka sena, ke tseye kotara ena, kgotsa le fa e le eng," lo a itse. Moo ke mokaneng e le boitsholo jwa 1964. "Ao, ke tlaa thusa gannye. Moo go siame, mo tlogele fela a tsamaye, lo a bona."

¹⁷¹ Fela o ne a tshotse mokwalo wa tumalano ya tshireletso. "Ba ba humanegileng mo moweng," Matheo 5 e re bolelela gore bao ke bone, "Bogosi jwa Legodimo ke jwa bone."

¹⁷² O ne a tswelela a kokotlegela ka dithoto, ebile a gola go feta le go atlega go feta, mme e le monna yo mogolo, fela tuelo ya gagwe kwa bofelong e ne ya tla. Kwa bofelong go ne ga tla. Mo lefatsheng o ne a nna le tuelo e kgolo. O ne a nna le tirelo e kgolo ya phitlho, ga go pelaelo epe. Moreri yo mogolo wa lekoko ne a tla, kooteng ne a bua mafoko a matona ka ga ena. Ba ka tswa ba ne ba folositse folaga e lepelele mo go seripa. Borakgwebo ba ba siameng thata ba ne ba mo rwalela kwa phitlhong ya gagwe. Fela Baebele ne ya re, "ko diheleng," tuelo ya gagwe e ne ya tswelela go gana mokwalo wa tumalano ya tshireletso ya Botshelo jwa Bosakhutleng.

¹⁷³ "Ko diheleng o ne a tlhatlosa matlho a gagwe, a neng a le mo tlhorisong." Mme o ne a leba kwa thoko go kgabaganya bosagatweng jo bogolo, jo Jesu a rileng ga go motho ope yo o kileng a bo kgabaganya kgotsa yo o ka bang a dira, mme o ne a fitlhela yo neng a tshotse mokwalo wa tumalano ya tshireletso ya Botshelo jo Bosakhutleng, a gomotsegile, ka kwa letlhakoreng le lengwe. Bone boobabedi. Mongwe o ne a E amogetse. Boobabedi ba ne ba bone tuelo ya bone. Mofeedi wa mafofora o ne a bona tuelo ya gagwe. Mme jaanong monna yo o humileng o fetoga go nna mokopi, "Mpe yo o nang le tumalano ya tshireletso a boe mme a kgome dipounama tsa me ka me—metsinyana, gonne dikgabo tsena di a ntłhorisa."

¹⁷⁴ O seka wa dira phoso e e tshwanang, rrakgwebo. Wena o motho yo o swang fela jaaka ba ne ba ntse ka gone. O tshwanetse o dire tshwetso. Dira peelseto ya gago jaanong. E tlhomamisse. "Tlhomamisang tlhopho ya lona, pitsa ya lona." Tsayang nngwe ya mekwalo ya tumalono ya tshireletso.

¹⁷⁵ Lebang fela—motsotso fela kgotsa e mebedi e mengwe, fa lo ka kgona. Motlheng Moshe, yo neng a hularela, a neng a le kgosi ya Egepeto, Faro, a tlota kgobololo ya ga Keresete. Faro o ne a leba ko ntle mo bathong bao e le segopa sa badubi ba seretse, fela Moshe o ne a ba lebelela e le batho ba ba nang le tsholofetso.

O ba leba jang, batho ba Modimo?

¹⁷⁶ Moshe o ne a bona tuelo ya gagwe. Elang tlhoko batsholakesi ba gagwe. Baebele ne ya re e ne e le "Baengele." Goreng? Ga go ope o sele yo neng a ka mo isa kwa a neng a ya gone. E ne e le batsholakesi ba gagwe.

¹⁷⁷ Go ne go na le Elia ka nako e basadi botlhe ba neng ba poma moriri wa bone, jaaka Mmê Kennedy le bone ba dirang gompieno. Ne ba tshasa difatlhego tsa bone ka pente, Jesebele mongwe. Kgosile batho botlhe ba ne ba fetoga ba nna selefatshe; kereke e dirile, le yone. Mme Modimo ne a romela moporofeti mo teng, ka leina la ga Elia, go kgala selo seo. Morago ga a sena go tsofala le go lapa, o ne a itlhawatlhwaeeditse go ya Gae, o ne a sa tshwanela le e leng go swa. Tuelo ya gagwe e ne ya tla, le ene, Modimo o ne fela a mo romelela golo koo karaki le dipits dingwe, a bo a mo rwalela kwa godimo ko Magodimong.

¹⁷⁸ Setefane, yo neng a eme kwa go ya Sanehedrini, ne a bua le bone a bo a re, “Ao, lona ba ba gwaletseng dithamo, lo sa rupang mo pelong le ditsebeng, lo gana mokwalo wa tumalano ya tshireletso, lo tlhola lo ganela Mowa o o Boitshepo. Jaaka borraeno ba dirile, le lona lo dira jalo.” Kwa losong lwa gagwe, o ne a nna le tuelo. O ne a leba ko godimo mme a bona Magodimo a bulegile, Jesu a eme mo letlhakoreng la moja.

¹⁷⁹ Moody, metlha ya bofelo, go ka nna dingwaga di le lekgolo tse di fetileng, mothula ditlhako yo monnye wa kwa Chicago, o ne a kgona ka boutsana go kwala leina la gagwe. Pampiri e ne ya romela gore Moody a botsolotswe, nako nngwe. Bodiredi jwa gagwe bo ne bo lemosega thata, ba ne ba batla go mmona a kwadile mo koranteng se se neng se go dira; se se neng se le ka ga Moody, ke mohuta ofeng wa moreri yo a tshwanetseng gore a bo a ne a le ene, le moreri yo o mathagatlhaga. Jalo he ba ne ba romelela potsolotso, go kwala mo kgangeng ya bone ya mogopolo wa morulaganyi. Mme Moody o ne a sa kgone le e leng go e bala morago ga ba sena go e kwala, jalo motsamaisi wa gagwe o ne a tshwanela go e mmalela. Mme o ne a re . . .

¹⁸⁰ Tsela e kgang ya mogopolo wa morulaganyi e balegang ka yone ke e. E ne ya re, “Goreng ope a tlaa ya go reetsa Dwight Moody a rera, ke mo go fetang mo nka go buang.” Ne a re, “Selo sa ntlha, ena ke monna yo o maswe go gaisa thata yo nkileng ka mmona, yo o tlhogo e e lefatla le ditedu di lepeletse.” Mme ne a re, “Ena o mokima go dikologa jaaka—jaaka ena a le moleele.” Mme ne a re, “Fa a leka go rera, ga a kgone go bala. Mme ena o a ngaya fa a rera, o bua ka nko ya gagwe, ebole o bua seleme.”

¹⁸¹ Erile a feditse, Rrê Moody o ne fela a khutlola magetla a gagwe, a bo a re, “Go tlhomame ga go jalo. Ba ne ba tlide go bona Keresete.” Jalo he moo e ne e le gone. Go sa kgathalesege se banyatsi ba neng ba le sone, o ne a tshotse mokwalo wa tumalano ya tshireletso.

¹⁸² Mme fa a ne a swa, mme ngaka e ne ya re, “Moo ke loso le le neng la itaya, Rrê Moody.”

¹⁸³ O ne a emeleta, o ne a re, “Lo bitsa mona loso? Lena ke letsatsi la me la go rweswa korone.” Lo a bona? O ne a tshotse mokwalo wa tumalano ya tshireletso.

¹⁸⁴ Tsala ya me e e molemo, Paul Rader. Erile ke le mosimanyana, ke ne—ke ne ka tshwaelwa mo kerekeng ya Missionary Baptist, mme Paul Rader e ne e le mo Missionary Baptist le ene, jalo, Fort Wayne, fa ke ne ke tlwaetse go ya go mo reetsa a rera. Morago, o ne a fitlha golo fano mo West Coast mme o ne a nna le bothata jo bontsi thata, mme kwa bofelong e ne e le bothata go fitlhela a ne a lwala, kwa bofelong go ne ga fetela pele ko kankereng, mme o ne a swa. Ena le Luke ba ne ba tsamaile ga mmogo botshelo jotlhe jwa bona, ba ne ba kgomarelane jaaka morwaake le nna.

¹⁸⁵ Jalo he erile Paul a ne a swa, Moody Bible Institute e ne ya romela kong diopedi tse nnê, mme ba ne ba eme foo. Paul o ne a na le bokgoni jwa go tshegisa. Mme o ne a le... E nnye e e dithata... Moody Bible Institute e nnye, le khwaere ena, e neng ba e rometse golo koo, kgotsa diopedi tse nnê, mme ba ne ba opela, “*Gaufi thata, Modimo wa Me, Le Wena*.”

¹⁸⁶ Paul o ne a retologa a bo a latlha letsela le tloge mo go ene. O ne a re, “Ke mang yo o swang, nna kgotsa lona?” Lo a bona? O ne a re, “Tthatlosang disiro tseo, mme lo nkopelele dipina dingwe tsa Efangedi tse di opelwang ka bonakwana.” Mme ba ne ba simolola go opela:

Golo kwa sefapaanong kwa Mmoloki wa me a suleng,
Golo koo go ntlafaletswa go tloga boleong ke ne ka lela;
Koo mo pelong ya me Madi a ne a dirisiwa;
Kgalalelo go Leina la Gagwe!

¹⁸⁷ Paul ne a re, “Morwarre o kae, Luke?” Luke o ne a le mo phaposing e e latelang. O ne a sa batle go bona morwarraagwe a swa. Ne a re, “Mmoleleleng a tle kwano.”

¹⁸⁸ Jalo he Luke ne a tsena. Ba le bantsi ba lona lo ne lo mo itse, mogoma yo mokima yo o mmele. O ne a tsena mo teng. Paul ne a otlollela seatla sa gagwe, a robetse mo bolaong, mme a tsaya Luke ka seatla a bo a leba ko godimo mo sefatlhengong sa gagwe, ne a re, “Luka, re tlide sekgala se se leelee ga mmogo. Fela akanya ka ga gone, Luka; mo metsotsong e le metlhano go tloga jaanong ke tlaa bo ke eme mo Bolengtengeng jwa ga Jesu Keresete, ke apesitswe ka tshiamo ya Gagwe.” A tshwere diatla tsa ga morwarraagwe, mokwalo wa gagwe wa tumalano ya tshireletso o ne wa duela.

¹⁸⁹ Ngaka Bosworth yo o godileng, yo neng a le fano la bofelo, le nna, gaufi le nakong ya bofelo, dingwaga di le masome a ferabobedi le bonê, ke ne ke fetsa go boa ko Aforika. Ke ne ke ka nna le mogala gore ke “tle ko Miami.” Ke ne ka kgagola dithaere di tloge fa koloing ya me, go batlile, go fitlha koo. Ne ya re, “O ne a swa.” Ke ne ka tabogela kwa go ena. Ke ne ke itse gore o ne a le yo o nang le mokwalo wa tumalano ya tshireletso. Ke ne ka ya golo koo.

¹⁹⁰ Ke ne ka tsena ka mo kamoreng koo. Mogoma yo monnye yo o tlhogo e e mafatla ka mabogo a gagwe a tsholeditswe, mabogonyana a gagwe a a masesane. Ke ne ka sianela kwa go ene ka bo ke wa ka sefatlhego sa me, ka bo ke lela, “Rrê wee, rrê wee, dikaraki tsa Iseraele le bapagami ba tsone!” Ne a baya diatla tsa gagwe mo go nna mme a ntshegofatsa.

Ke ne ka re, “Mokaulengwe Bosworth, a nka go rapelela?”

Ne a re, “Nnyaya.” Ne a re, “Ga ke lwale.”

Ke ne ka re, “Kgang ke eng, Mokaulengwe Bosworth?”

Ne a re, “Nna fela ke ya Gae.”

¹⁹¹ Ke ne ka re, “Ke ne ke itse seo.” Mme ke ne ka re, “Ke batla go go botsa sengwe, Mokaulengwe Bosworth.” Ke ne ka re, “Nako e kgolo go feta thata ya botshelo jwa gago le bodiredi jwa gago e ne e le leng? O nnile o direla Modimo pele ga ke ne ke tsalwa. Re nnile re le mo madirelong a boanamisa tumelo ga mmogo. Re nnile re le mo matsubutsubung, mo loaping le mo lewatleng. O ne wa nkema nokeng fa ke ne ke bona bodiabolo mo lethakoreng lengwe le lengwe, le baloi. Mme go ne go ne boitumelo gantsi fa re ne re bona Modimo a eme foo a ba bolaya ditokololo. Boitumelo jo bogolo go feta jwa botshelo jwa gago e ne e le eng?”

¹⁹² O ne a re, “Gone jaanong.” O ne a ipaakanyetsa go tsaya tuelo ya mokwalo wa gagwe wa tumalano ya tshireletso. O ne a re, “Gotlhe mo ke go tsheletseng, Mokaulengwe Branham, e ntse e le Jesu Keresete, mme motsotsotso mongwe le mongwe O tlaa tsena mo mojakong go nkisa Gae.”

¹⁹³ Ee, bao e ne e le ba ba nang le mokwalo wa tumalano ya tshireletso ba ba neng ba neela sengwe le sengwe se ba neng ba na naso, ba bo ba se beeletsa mo Pereleng ya tlhwatlhw a kgolo. A lona ga lo tle go beeletsa, bosigong jono, le lona, fa re santse re oba ditlhogo tsa rona?

¹⁹⁴ Ga ke kgone go bona go kgabaganya bareetsi. Ga ke itse gore ke eng . . . ke ba le kae, kgotsa ke mang yo o lebeletseng mo teng, mo thelebishineng ya kgaso e e tswaleletseng fa tikologong bosigong jono. Ke ile go go kopa, tsala, o se letle gore ano e nne mafoko a a bodufetseng. O motho wa botshelo jo bo khutlang. O tshwanetse o swe. O a go itse. Mme go ka nna ga nna gore pele ga moso nako ya gago e tlaa tla. Nna ga ke . . . motho yo o leng thata mo go pateleleng go amogela; mme, ka gore Jesu ne a re, “Botlhe ba Rara a ba Mphileng ba tlaa tla.” Fa go na le bonno mo pelong jwa mokwalo oo wa tumalano eo ya tshireletso, bosigong jono, a wena o ka se E amogele? Mokwalo oo wa tumalano ya tshireletso ke Keresete, mokwalo wa tumalano ya tshireletso wa lorato la Modimo ka ntlha ya gago, Lefoko la Gagwe le fetoga le nna le le tshelang mo pelong ya gago, le go dira karolo ya Gagwe. Ena ke Lefoko. Mo amogele ka mo botshelong jwa gago. A wena o ka se kgone go go dira, mme o dire peeletso ena e tona?

¹⁹⁵ Go ya ka fa ke kgonang go bona, ga ke kgone go bona fa e se go ka nna difutu di le lesome go tloga fa go mna, kgotsa lesome le botlhano. Ke ile go go kopa gore o tsholetse diatla tsa gago fa o tlaa rata go amogela mongwe wa mekwalo ya tumalano ya tshireletso ya Botshelo jo Bosakhutleng. E re, “Ke a o batla, Mokaulengwe Branham. Nkgakologelwe fela mo dithapelong tsa gago. Ga o bone seatla sa me, fela Modimo o a dira.”

¹⁹⁶ Rraetsho wa Legodimo, polelo ena e e bokgwabo, e e makgwakgwa, ntswa e le polelo ya nneta ya botshelo. Ke go buile ka tsela ena, Morena, ka gore batho bao, batho ba kgwebo, ba tlaa go tlhaloganya thata ka tsela ya go nna sengwe se se emetsweng fano mo lefatsheng. Leo ke lebaka le ke go bitsang mokwalo wa tumalano ya tshireletso. Intshwarele fa ke ne ke le phoso mo go go bitseng seo. Gonnie, rona jaanong re mo motso—motsotsong o o boitshepo tota, kwa go senang pelaelo gore go na le ba le bantsi ba ba akanyang ka tlhoafalo jaanong, ba itseng gore bona le bona ba tshwanetse ba bone morokotso ka ga le fa e le eng se ba nang naso fano, mme ba bona se go se rayang go gana.

¹⁹⁷ Jaanong, lekau leo, jaaka ke itse, kooteng le tumile thata mo gare ga batho, o ne a sala mo kerekeng, o ne a tshegetsa ditaolo, ga a a ka a dira boaka, kgotsa a utswa, kgotsa a dira dilo tseo, fela mo pelong e e leng ya gagwe o ne a itse gore o ne a sena Botshelo jo Bosakhutleng. Dira bao, Morena, ba ba lekang go Go kgatlhantsha, ka ntlha ya Botshelo jo Bosakhutleng, ka fela dipopego tseo tsa maitsholo, mma bona bosigong jono ba amogeleteletso, mme ba nne fela fa dinaong tsa bona, mme ke re, “Morena, ke tlaa dira sengwe le sengwe se O se ntopa gore ke se dire.” Go dumelele, Morena.

¹⁹⁸ Bone bottlhe ke ba Gago jaanong. Ke neela sengwe le sengwe ko go Wena. Mme fa peo e wetse gongwe, Morena, mo mmung mongwe, peo epe e e tlhomamiseditsweng pele, ka dingwaga di le dintsi e ntse e tshwerwe ke tlala ebile e nyorilwe, e ka tswa e wetse golo gongwe bosigong jono. Mma ba amogelete Botshelo, Rara, gonnie ke go kopa ka Leina la Jesu Keresete.

¹⁹⁹ Mme ka ditlhogo tsa rona di obilwe go tswelela, ke ile go kopa Mokaulengwe Pearry, fa a ratile, go tla fano mme a sale, a tseye mo go setseng ga tirelo.



DIPEELETSO TSW64-0314
(The Investments)

Molaêtsa o ka Mokaulengwe William Marrion Branham, o nê wa rêrwa la ntlha ka Sekgowa mo maitseboeng a Lamatlhatso, Mopitlwé 14, 1964, go direlwa moletlo wa dijo wa Businessmen Appreciation kwa Beaumont Hotel ko Beaumont, Texas, U.S.A., o tsérwe mô theiping ya makenete mme wa gatisiwa ka Sekgowa o sa khutswafadiwa. Phuthololô e ya Setswana e gatisitswêle go abiwa ke ba ga Voice Of God Recordings.

TSWANA

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kitsisô ka tetlokhopi

Ditshiamelo tsotlhe di sireleditswe. Buka e e ka gatisiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwé go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwá go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org